

CORINTOMO ITE CRISTONA HNOTINOMO PABLO NANO ORETAGA RABE

Corintomo ite creyentiaimo Pablo cartana orede

1-2 Corinto railla nairaïmo ite creyentiaï, ¿nie isoidomoi? Pablodicue. Carta omoïmo oredicue. Jusiñamui jitailla jira, Jesucristo rafuena cue llollena, cuena fetode. Sóstenes cue diga illa jira, omoï dine coco uaina oredicoco. Jesucristo dibeimona naimiedi cai ama. Jai Jusiñamui cominidomoi. Jesucristomo omoï duilla jira, Jusiñamui omoïna jai marebicaitate. Jusiñamui omoïna fetode, naimie iena. Ua nana cai Nama Jesucristona sedadinodicaidi Jusiñamui iena.

3 Cai Moo Jusiñamui, cai Nama Jesucristo diga, omoïna jai duenaite. Iena uiñocana mai omoï jai. Iaimaiaï omoïna uri jai itatatiaïmaiaï. Iena omoï uiñocana mai omoï jai.

Cristo muidona Jusiñamuimona ailluena feiñoticaï

4 Jusiñamui diga cue ñaïa, omoï facaina iobillacinona jaca fecadicue. Jesucristomo omoï duillamona, Jusiñamui omoïna jai duenaite. Ie jira naimiemo omoï facaina iobillacinona jaca fecadicue.

5 Jusiñamui omoïna duenaillamona, ie rafuena omoï llollena, naimiemona ailluena uaina feiñotomoi. Cristomo omoï duillamona, naga icaiño Cristo rafuena omoï jino lloia, omoïna eo canode. Omoïna naimiemo ite rafuena raise uiñotade.

⁶ Ie muidona Cristo rafuena raise ñnotomoi. Cristo rafuena cai jino llumona, naimiemo raise ñnofidomoi.

⁷ Ie muidona Jusiñamuimona omoimo jaca buena fiebiñede, naimie dibeimo omoi raise maijillena. Naimie dibeimo omoi raise maijiamona, naimie dibeimo jiaie creyentiaina raise itatacana jaidomoi. Cai Nama Jesucristo abido billemo iocire omoi ocurillanona, Jusiñamuimona ailluena rafuena feiñotomoi.

⁸ Jeacinona omoi finocabi raillano, naimie nia abido biñelle dinori Jesucristo omoi comeciaina raise sedaite. Cai Nama Jesucristo abido bia, nicino omoimo iñena muidona, omoina duere finoñeite. Naimie bia, naimacimo jeacino nia illa jira, naimiema ñnoñedinona duere finoite.

⁹ Jusiñamui ie lloga uaina jaca finoite. Naimie ñnogamie. Naimie Jitona omoi nabaillena omoina fetode. Naimie Jitodi cai Nama Jesucristo.

Naimaci comeciadi daje isoi lloñedimaci

¹⁰ Cue amatiai, omoimo rafuena lloiticue. Cai Nama Jesucristomo omoi duilla jira, iena lloiticue. Omoi comeciadi daje isoi lloillana jitaidicue. Daje isoi omoi comeciadi facajana jitaidicue.

¹¹ Cloé raillamie cominimona bie rafuena cue fidia jira, iese omoimo lloiticue. “Omoi comeciadi daje isoi iñedomoi” naimie llote.

¹² Omoimona damierie raitomoi: “Dani Pablo llofuia dibecinodo jai jaidicai”. Damierie raitomoi: “Dani Apolos raillamie llofuia dibecinodo jai jaidicai”. Damierie raitomoi: “Dani Pedro llofuia dibecinodo jai jaidicai”. Damierie raitomoi:

“Dani Cristo llofuia dibecinodo jai jaidicai” rait-
omoi. Nana iese itomoi. Iemona omoi comeciai
daje isoi iñedomoi. Cloé cominimona iese fididicue.

¹³ Ero, diga omoi Jilloitaraini iñede. Omoi
jeacinomona omoi jillobillena, dama Cristo illa.
Omoi facaina cruzmo cuedi fioidañedicue. Cue
dibeimo omoi illena cue bautizañegaomoi.

¹⁴ Omoina cue bautizañena jira, omoimo ite ra-
fue cuemona comuiñena jira, iobidicue. Dama
Crispona bautizadicue. Gayona jiai bautizadicue.

¹⁵⁻¹⁶ Estéfanos jofomo ite cominina bautizadicue.
Jiaie cominina cue bautizajana comeciñedicue.
Ie muidona: “Pablo facaina bautizadica”
llonidomoi. Daje isoi omoi comeciai lloñenia,
cue muidonañede.

¹⁷ Ailluena cominina cue bautizallena, Cristodi
cuena oretañede; iadedi naimie rafuena cue llo-
fuellena, cuena oretate. Eo abina uiñoraïma isoi
omoïmo cue llofueticuedena, cue lloga rafuemo
omoi comeciaina facañedomoi. Ie jira eo abina
uiñoraïma isoi omoïmo llofueñedicue. Cristo fio-
daillamona, omoi jeacinomona naimie omoïna jil-
lotate. Iena omoi feitañenana jitaidicue.

*Cristo fïnoça rafuemona Jusiñamui uai siñonana
uiñotïcai*

¹⁸ Cristona ñnoñedinomona cruzmo Cristo fio-
dailla rafuedi jamaifue. Naimacidi faificana jai
jaidimaci. Jusiñamuimona naie rafue illa jira,
caïmona naie rafuedi siño. Naie uaidi diga
comini comeciai meidorede. Caidi naie rafuena
ñnotïnodicai.

¹⁹ Ero, Jusiñamui facaina lloraïma micori
Cristona ñnoñedinona jaie cuete:

Jusiñamui lloste: “Abina uiñoraini imaci uiñuacinona saitaiticue.

Abina baitadino imaci baitajacinona saitaiticue” lloste.

Ie muidona naie isoide comini jilloñenana jai uiñoticaí.

²⁰ Naie isoide comini uiñuacinomona jaca jillonidicaí. Abi uiñoraima uiñuacinodi Cristo fiodailla rafue baifemo faiñede. Moisés micori cuegafuena uiñoraima uiñuacinodi Cristo fiodailla rafue baifemo faiñede. Uaina uaitatimie birui ite uiñuacinodi Cristo fiodailla rafue baifemo faiñede. Jusiñamuidi naimiena uiñoñedino imaci abi uiñuacinona jai jamaitate. Iena naimie jamaitajamona, naimaci uiñuacinodo naimaci jilloñenana jai uiñoticaí.

²¹ Ie jitaillacino diese Jusiñamui finua jira, naimaci abi uiñuacinomona naimiena ñnoñedimaci. Ie jira naimie mare jitaillacinomona, naimiena ñnotinona jai jillotate. Naimaci jeacinomona naimacina jai jillotate. Cristo rafuena cai llumona ñnotimaci. Jusiñamuina ñnoñedinodi naie rafuena: “Jamaifue” raitimaci.

²² Siño rafuena naimaci cioacana jira, judíuai railla cominidi iese raitimaci: “Siño rafuena Jusiñamui finoa, omoi lloga rafuena ñnoiticaí” raitimaci. Grieguai railla comini dinena raitimaci: “Omoi lloga rafuena cai abina uiñuacino ie isoitena, iena ñnoiticaí” raitimaci;

²³ Iadedi Cristo rafuena llocana jaidicaí. Cruzmo naimie jai fiodaillana lloticaí. Ie jira judíuaidi cai lloga rafue muidona iciritimaci. Naiena oiacañenano iciritimaci. Damie naimaci illaimana

jaillemo ocuridimaci. Naimaci ocurillamie fodaillamo naimaci comeciaina facañedimaci. Cristo fodailla jira, raitimaci: “Naimiedi cai ocuriñenamie” raitimaci. Judíuainedino dinena raitimaci: “Omoí lloga rafuedi jamaifue” raitimaci. Ailluena comini cai lloga rafuena jitaiñedimaci;

²⁴ iadedi Jusiñamui damerie judíuaina jai fetode. Dajerie judíuainednona jiai jai fetode. Cruzmo Cristo fodaillamona, jeacino anamona naimaci jillua jira, naie fetocano dinena Jusiñamui uai siñonana uiñotimaci. Cristo finoca rafuedo naimaci jilluamona, Jusiñamui abina uiñuana jiai uiñotimaci.

²⁵ Jusiñamui Cristona orede, cai jeacino facaina naimie fodaillena. Jusiñamuina ñnoñedinomona Cristo finoca rafuedi jamaifue. Ebinidifue. Caimona Cristo finoca rafuedi Jusiñamui ñnoñedino uiñuacino baifemo faite.

²⁶ Cue amatiai, Jusiñamui omoína navui fetode; iadedi ¿nie isoidomoi? Jamai bue isoidomoi. Omoí comeciaina iemo faca. Jusiñamuina ñnoñedinomona abina uiñoñedomoi. Omoí creyentiai dibeimo eo abí uiñotino raise iñedimaci. Omoí creyentiai dibeimo illaicomini raise iñedimaci. Omoí creyentiai dibeimo ucuberedino raise iñedimaci. Jusiñamui ie isoidinona eo fetofede;

²⁷ iadedi abina uiñoñedino raillanodomoina fetode, eo abina uiñotino dinena meidaillena. Illaicominiñedinona jiai fetode, illaicomini dinena meidaillena.

²⁸ Jamai bue isoidinona fetode, jamai bue isoíñedino baifemo faillena. Jusiñamuimona jamai bue isoíñedinodi jamai comini.

²⁹ Ie muidona jaca buna Jusiñamui uicomo abina iedoñena.

³⁰ Caina ie cominina Jusiñamui jaitaja jira, Jesucristomo duidicai. Cristomona Jusiñamuina uiñoticai. Cristo fiodailla jira, Jusiñamui cai jeacinona feitate. Iemona jeacino cai finoñellena, caina canocabide. Jusiñamuidi jeacino anamona caina jiai jai jillotate.

³¹ Jusiñamui facaina lloraima micori iena jaie cuete: “Bu abina iedoiacania, nana Cristo finoca rafue diga naimie abina iedua” cuete.

2

Pablodi cruzmo Cristo fiodailla rafuena llocabite

¹ Cue amatiai, omoi dine navui cue rillamona, Jusiñamuimona cue feiñoga rafuena llofueticue. Omoi baifemo eo abina uiñoticuedena, iese niade llofueñedicue.

² Daje rafuemo cue comecina facacabidicue. Ie jira omoimo dama Jesucristo rafuena llofueiacadicue. Cruzmo naimie fiodailla rafuena llofueiacadicue.

³ Omoi motomo navui cue ia, meiruiocaillamona jacinaoidicue. Jusiñamui facaina cue raise jino lloñeni raillano jaciruioidicue.

⁴ Comini abi uiñuacinodo omoimo llofueñedicue; iadedi omoi jeacinomona omoi jilluamona, Jusiñamui Joreñodi omoina cue lloga rafue siñonana uiñotade.

⁵ Jusiñamuidi cue iese llofuiana jitaide. Comini abina uiñuacinona omoi cacajamona, Cristona ñnoñedomoi; iadedi Jusiñamui omoina jillotaja jira, jai ñnotomoi.

Jusiñamui Joreñodo bie rafuena uiñoticaí

6 Comini abí uiñuacínodo llofuecabiñedicue; iadedí Jusiñamuimona ite abí uiñuacínodo llofuetícue. Cristona raise ñnofidinomona abí uiñuacínodo llofuetícue. Cristo facaina llorainídi cue isoi jiaí llofuecabitímací. Cominimo jai ite uiñuacínodo llofueñedícaí. Illaicomini uiñogacínodo llofueñedícaí. Ico faífitímací. Ico jiaí uainicaitímací. Ie jira naimací uiñogacínodo llofueñedícaí;

7 iadedí Jusiñamuimona abí uiñuacínona caí feiñuamona, iedo llofuetícaí. Nano dofoconi, enirue nia finoñenia, naimie comeci iena uiñote. Monamo naimie ebirede illanomo ico caí illena jitaide. Iena jaie caí uiñoñedícaí. Jusiñamui jaca buna iena jaie uiñotañede.

8 Birui ite illaicomínidí Jusiñamuimo ite rafuena nia uiñoñedímací. Iena uiñotímacídena, cruzmo caí ebirede Namana meineñedímací. Naimie uai ebirede. Nana ra naimie jai finua jira, naimie uai siño. Jusiñamui rafuena raise uiñoñedímací; iadedí Jusiñamui caina iena uiñotade.

9 Jusiñamui facaina lloraima micorí iena jaie cueba:

Jaca buna naimiena ñnotíno facaina Jusiñamui finoca rafuena cioñede.

Jaca buna iena cacaiñede.

Jaca buna iemo comecina facañede

cuega. Jusiñamui rafuena uiñoñedíno naie rafuena jaca uiñoñeitímací; iadedí naimiena isiruitíno naie rafuena uiñotímací.

10 Birui Jusiñamui caina iena uiñotade. Ie Joreñodo caina uiñotade. Ie Joreño naga rafuena uiñote. Nana Jusiñamui comecimo itícinona jiaí uiñote.

11 Jaca budi jiaimie comecimo iticinona uiñoñede. Dama naimie iena uiñote. Ie isoide. Jaca budi Jusiñamui comecimo iticinona uiñoñede. Dama naimie Joreño iena uiñote.

12 Jusiñamuimona ie Joreño jai feiñoticaí. Jiaie cominimona naie Joreño feiñoñedicai. Jusiñamui Joreñodi caina Jusiñamui caimo caidiñeno fecaca rafuena uiñotade.

13 Omoimo naie rafuena llofuecabiticaí. Cominimona fueoga uaido llofueñedicai; iadedi Jusiñamui Joreño caimo llofua uaido llofueticaí. Ie jira Jusiñamui Joreño ite cominimo naie rafuena llofuecabiticaí.

14 Jusiñamuina ñnoñedinodi Jusiñamui Joreñomona iticinona feiñoñedimaci. Naimacimona naie rafue jamaifue. Iena cacaiñedimaci. Iena jiai uiñoñedimaci. Dani Jusiñamui Joreño illa cominidi naiemo cacarefidimaci.

15 Nana Jusiñamui jitailla rafue diese cacadimaci. Jusiñamuina ñnoñedinodi Jusiñamui Joreño illa comini illa rafuena jiai raise uiñoñedimaci.

16 Jusiñamui facaina lloaíma micori iena jaie cuega: “Jaca buna Jusiñamui comecimo iticinona uiñoñede. Budi naimiena jiai llofuenide” cuega. Ero Cristo comecimo iticinona cai uiñua jira, Jusiñamuina ñnoñedinodi caina raise uiñoñedimaci. Caina jiai llofuenidimaci.

3

Danomo Jusiñamui ñibeimo maijidimaci

1 Cue amatiai, Jusiñamui Joreño anamo itinona omoi raise itomoidena, omoína llofueñedicue.

Omoï jitaillacinodo nia omoï jailla jira, omoïna llofueticue. Cristo rafuedo janore jai jaidomoï. Jusiñamui uruiaïna jai jaidomoï; iadedi monoï ijina jirode urue isidomoï. Jusiñamuimona nia moonaiñedomoï isidomoï. Creyentiaina omoï jailla mei, Cristo rafuedo eo jaiñedomoï.

² Feinide rafuena navui llofueticue. Eo feirede rafuena omoïmo llofueñedicue. Omoïna iena nia llofueñedicue. Omoï uruiaï janore moonailla mei, guitimaci. Ie isoide. Cristona cai ñnua mei, naimie rafuena ñnocana cai jailla; iadedi omoï raise jaiñena jira, Jusiñamuimona nia moonaiñedino isidomoï.

³ Nia omoï jitaillacinodo jaidomoï. Jusiñamui Joreño anamo nia raise iñedomoï. Coninina abina uradoidomoï. Omoï comeciai daje isoi lloïñedomoï. Jusiñamuina ñnoñedino isoi nia itomoï. Jamai ebe isoi nia itomoï.

⁴ Omoïmona damierie: “Pablo llofuiadibecinodo jaidicai” raitomoï. Jiaïno: “Apolos raillamie llofuiadibecinodo jaidicai” raitomoï. Iese omoï raia, Jusiñamuina ñnoñedino isoi itomoï. Ie jira iese raiñeno.

⁵ Jamai bue isoidicue. Apolos jiaï jamai bue isoide; iadedi Jusiñamui diibeimo coco maijiamona, Cristo rafue coco llofuiamona, iena ñnotomoï. Jusiñamui cocomo llua isoi, ie rafuena lloticoco.

⁶ Naie rafuena cue llofuiamona nano ñnotomoï. Ie mei Apolos iena dane llofue. Iese llofueuidicoco; iadedi dama Jusiñamui omoïna naie rafuena ñnotacana jaide.

⁷ Ie muidona naiemona cai fueua. Jamai bue isoidicoco. Jusiñamui coco bai femo faite. Ie jira naimie omoïna ñnocana jaitate.

⁸ Daje uaina Apolos diga maijidicue. Coco maijia diese Jusiñamuimona coco ibana feiñotícoco.

⁹ Jusiñamui facaina maijidicoco; iadedi naimiedi omoína ñnocana jaitate. Naimiedi omoí comeciaina marena itatacana jaitate.

¹⁰ Jusiñamui cuemo llua isoi, naimie cuena canua diese, Cristo rafuena llofueticue. Cristo rafuena eo cue uiñuamona, Cristo rafuena omoímo navui llofueticue. Cue lluamona Cristona ñnotomoi. Birui jiaimie omoína naie rafuena jai llofuate. Omoí comeciaino naie rafue raise itabillena, omoína llofuate. Bu omoína llofueia, omoí comeci marena illacinomo naimie comecina facajanona, omoína naimie llofuecabilla.

¹¹ Omoí jeacinomona omoí jilloillena, jaca daje rafue ite. Jiaie rafuedi ññede. Iena omoímo jai llofueticue. Naie rafuedi Jesucristona ññaite.

¹² Iena raise atona bu llofueia, uanaicinona jaca llofuiamona, cominina Cristona ñnocana jaitate. Naie rafuedi naimaci comeciaino raise itabide. Iena raise atona bu llofueñenia, uanaicinona jaca llofueñenia, cominina Cristona ñnocana jaitañede. Naie rafuedi naimaci comeciaino raise itabiñede.

¹³ Jusiñamuidi nagamie ie llofuiacinona íco lloite. Jesucristo abido bia, Jusiñamui ñie isoidicinodo naga naimie facaina maijídino llua lloite. Naimaci llogacinona eo facaciite.

¹⁴ Ie mei Cristo rafuena raise atona llotinodi Jusiñamuimona ibana feiñoitimaci.

¹⁵ Cristo rafuena raise atona lloñedinodi Jusiñamuimona ibana feiñoñeitimaci. Naimaci niade jai faifitimaci; iadedi faifñeitimaci. Jusiñamui diga jaca iitimaci; iadedi tainomo maijidimaci.

16 Jusiñamui ie illano omoï comeciaïmo illana uiñotomoï. Naimie Joreño omoïmo illa jira, Jusiñamui ie illanodi omoï creyentiaï.

17 Cristo ðibeimona omoï creyentiaïna bu abido danomo itataia, Jusiñamui naimiena duere finoite. Jusiñamui omoïmo jai illa jira, naimiemo jai duidomoï. Ie jira naimie ðibeimona omoïna itatatimiena duere finoite.

18 Bie rafuedo omoï raise jaillena, dani omoï abiaïna jifueñeno. Creyenteñedino uiñuacınodo jaiñeno. Omoïmona bu iedo jaiacania, naimiemo llono: “Naie isoide rafuedo o jaiñeno”. Iedo naimie jaia, creyenteñedinomona abina uiñoite; ia Jusiñamuimona abina uiñoñeite. Jusiñamuimona abina uiñotınona omoï jaillena, creyenteñedino uiñuacınodo omoï jaiñeno.

19 Jusiñamuimona naimiena ðnoñedino uiñuacınodi jamaifue. Jusiñamui facaina lloraïma micori jaie cueda: “Jusiñamuidi comini abi uiñuacınona uiñuanona, naimacina jai emodofide. Naimacina jai duere finode”.

20 Jiai cueda: “Jusiñamuidi abi uiñotino railla comini imaci comeciaï facajacino jamaifuen a uiñote”.

21 Ie jira omoï llofueraïniri abi iedoñeno. Jusiñamuimona nana rafue omoïmo jai illa jira, naimaci abi uiñuacınodo abina iedoñeno.

22 Marena omoï comeciaï illacino jitai raillano, Cristo omoï ðine caina oretate. Cuena oretate. Apolona oretate. Pedrona oretate. Naiemona omoï ra ollena, omoï jitai raillano, eniruedi ite. Omoï jitai raillano, birui nana omoïmo ite rafuedi suide. Omoï jitai raillano, jiaïruido nana omoïmo

iite rafuedi suite. Nia omoi fioidañenia, Cristo omoina canoite. Omoi fioidaia, naimie dine jait-
 omoi. Naiemona marena omoi comeciai illacino
 jitai raillano, ua nana rafue omoimo jai ite.

²³ Cristomo omoi jainaiaila jira, naimie anamo
 itomoi. Jusiñamuimo Cristo jainaiaila jira, naimie
 Jusiñamui jitailla rafuena jaca finocabide. Ie jira
 naimie jitaillacinona finocana omoi jai.

4

Cristo fetocano naimie dibeimo maijide

¹ Caïmo omoi comeciaina faca. Cristo dibeimo
 maijídicaï. Jusiñamui rafuena llocana jaidicaï. Iena
 jaie uiñoñedicaï; iadedi naimie caina uiñotaga ra-
 fuena birui llofueticaï.

² Ero, naga patródi naimie dibeimo maijídino
 naimie lloga uaina ñnuana jitaide. Ie isoide.
 Jusiñamuidi ie facaina lloraini naimiena naimaci
 ñnuamona naimie rafuena raise lluana jitaide.

³ Cue uaina omoi uaitañenia, iena omoi uaitaia,
 jiaïno iena uaitaia, iemo comecina facañedicue.

⁴ Cuemo nicino ia, iena uiñoñedicue; iadedi
 Cristomona cue comecimo jeacino ñibai ite. Ia,
 naimie cuemo lloite. Iemona cuena duere finoite.

⁵ Ie jira: “O llucino mare” cuemo lloñeno.
 “O llucino marañede” cuemo jiaï lloñeno. Cai
 Nama nia abido biñenia, iena cuemo omoi lloñeno.
 Naimie bia, nana comini comeciaino ite ra-
 fuena uiñotaite. Naimaci comeciaino ite jitaill-
 acinona uiñotaite. Iemona naimaci maijia ñinori
 Jusiñamuimona iobillacinona feiñoitimaci. Naie fa-
 caise cuemo ite rafuena lloite. Ie jira nia cuemo
 lloñeno.

⁶ Cue amatiaí, naie rafuena omoí raise uifollena, Apolona ja ñaiticue. Cocomona omoí fueollena, cuena jiaí ja ñaiticue. Omoí facaina ñaiticue. Jusiñamuina ciegafue llua isoi, omoí illana jitaídicue. Omoí llorainiri tainomo iobiñeno. Omoí Cristo facaina llorainimona damie jiaíe lloraima baífemo faíamo omoí comeciaina facañeno.

⁷ Nana omoí llofuerainídi daje isoidimaci. Jusiñamuimona nana naimacimo ite uaina feiñotimaci. Dani naimaci comeciaimona iena naimaci oñena jira, ie díga abina iedoñeno.

⁸ “Nana Jusiñamuimona iticinona jai feiñoticaí. Jusiñamuimona nana cai jitaillacinona caímo jai ite. Jusiñamui sedajanomo illainina isoi jai iticaí” omoí comeciaina facadomoí; iadedí nia iese iñedomoí. Nainomo itomoidena, nainomo coco jiaí illa jira, cuemona eo mare. Nainomo iticocodena, cuemona eo mare; iadedí jiaíe rafuemo cue comeciaina jai facadícue.

⁹ Jusiñamuidi nana omoína cue baífemo faitatate raillanomo cue comeciaina facadícue. Cristo rafuena llorainídicaí; iadedí cue baífemo omoí faíamo cue comeciaina facadícue. Omoímona jamai bue isoidicaí. Nana comini duere cai illamo raise eruaidimaci. Jusiñamui jaienisaídi duere cai illamo jiaí eruaidimaci.

¹⁰ Cristo rafuena cai llua muidona, omoímona ebe isoidicaí. “Cristo rafuena raise inuanona, iedo raise jaidicaí” raillanomo omoí comeciaina facadomoí; iadedí Jusiñamuimona iese iñedomoí. Omoímona cai uaidí raise baiñede. “Cai uaidí caímo raise baite” raillanomo omoí comeciaina facadomoí; iadedí Jusiñamuimona iese iñedomoí. Omoímona jamai bue cai isoilla jira, caíri

jaisitomoï. “Jiaie comini cairi iobidimaci” raillanomo omoï comecina facadomoï; iadedi Jusiñamuimona iese iñedomoï.

¹¹ Cai guille buedi jaca iñede. Iniroinidicai. Jiaie comini caina duere finodimaci. Jofonidicai.

¹² Cai ra ollena, cai onolli diga duere maijidicai. Comini caina jeare ñaitimaci; iadedi ibana oñedicai. Naimaci diga marena ñaiticai. Caina duere finodimaci; iadedi uai oñeno ibana oñedicai.

¹³ Cai joreña jeare ñaitimaci; iadedi cai dinena naimaci diga marena ñaiticai. Naimacimona jamai bue isoidicai. Iese caimo naimaci comeciainia facadimaci; ia Cristo dibeimo ie rafuena niallocana jaiacadicai.

¹⁴ Bie carta cue cuiamona, omoïna meiruitaia-caiñedicue; ia omoïna niallofueiacadicue. Isiruiga uruiaïdomoï isoidomoï. Ie jira bie rafuena omoï raise uiñuana jitaïdicue.

¹⁵ Omoïna Cristo rafuena llofuellena, diga lloraini omoïmo ite; iadedi cuemona Cristo rafuena omoï nano cacaja jira, omoï moo isoidicue. Cue uruiaïna jai jaidomoï isoidomoï.

¹⁶ Ie jira omoïmo cue llogacïnodo mai omoï jai.

¹⁷ Iedo omoï jaillena, omoïna canollena, omoï dine Timoteona jai oredicue. Naimïena isiruiticue. Naimïedi Cristo ie ñnogamïe. Cuemona Cristo rafuena naimïe cacajanona, iena ñnote. Ie jira naimïedi cue jito isoide. Creyentiaï illanomo cue ia, Cristo rafuena jaca llofueticue. Naie rafuedo cue jitailla isoi, iedo omoï raise jaillena, naimïedi omoïna llofuate.

¹⁸ “Pablo caina jaciruilla jira, naimïe cai dine biñeite” raillanomo omoï comeciaina facajamona,

omoi mona damierie jai abina biridomoi.

¹⁹ Iese comeciaina facadomoi; iadedi Jusiñamui jitaia, omoi dine raire jaiticue. Ie mei nie isoide uai naie abina biridinomo illana uiñoiticue. Naimaci ñaiacinodo iena uiñoñeiticue; iadedi naimaci finoca rafuemon a iena uiñoiticue.

²⁰ Ero, jamai ñaiamona, Jusiñamui anamo naimie jitailla isoi iñedica; iadedi naimie finoca rafuedo cai jaillamona, naimie jitailla isoi itica.

²¹ Omoi dine ico cue ria, ¿niese omoi diga ñaiticue? Cueno llono. Cue llua na omoi ñnoñenia, omoi mo riire lloiticue. Cue llua na omoi ñnoia, omoi na cue isiruillamona, omoi mo fecuise lloiticue. Ie jira cueno llono.

5

Pablo eo jearede rafuena finodimiena riire llote

¹ Jiaie rafuena omoi mo lloiticue. Eo jearede rafue omoi motomo jai illana jai fididicue. Jusiñamuina ñnoñedino naie isoide rafuena ñnoñedimaci; iadedi omoi mona damie ie eicañona ote, ie aina.

² Jearede rafue omoi motomo ite; iadedi nia abina iedotomoi. Naie isoide rafue omoi motomo navui suilla jira, ¿bue ñellena sunañedomoi? Omoi rocabillacom naimie bia, naimie fo billana rairui.

³ Omoi dine iticuedena, bie rafue dani omoi siadollena, omoi danomo ofillena lloiticue. Omoi dine cue iñena jira, cue comecidi omoi dine ite. Bie rafuemo cue comecina facaoidicue. Bie rafue omoi diga are siadoñeiticue; iadedi naie rafuena finodimiena cue ñaiana jai uiñoticue.

4 Cai Nama Jesús facaina cue ñaiamona, naimiena ñaiticue. Ofillanona bie rafue omoi siadollena, omoi diga cue iacanana omoi comeci. Omoina canollena, cai Nama Jesucristo omoi diga ite.

5 Taifemo jearede rafuena finodimiena sofe. Taife anamo naimie jai illa jira, duere sefuite; iadedi naiemona fueoite. Duere sefuillamona, Cristo dibeimo dane iite. Cristo ico abido bia, naimiedi Cristo dibeimo dane raise illa jira, Cristo naimiena duere finoñeite.

6 Jearede rafue omoi motomo illa jira, ¿buena abina iedotomoi? Janorede siritate ra juilliruaimo faiamona, nana naie juilliruai sircana jaitate. Iena uiñotomoi. Ie isoide. Janorede jearede rafuemona, eo ailluena jearede rafuena oni jaide. Omoimo ite jearede rafuemona oni omoi i, naiemona jearede rafuedo omoi jaisa.

7 Judíuai railla cominidi pascua railla rafuena finoacania, nana siritate ra naimaci jofuemona oni dotadimaci. Ie isoide. Cristo jitailla isoi omoi illena, omoi comeciaino ite jeacinona fainonocai. Jeacino anamo omoi jai illa jira, iena fainonocai. Pascua rafue facaiseconi judíuai cominidi toica llaudaiai fajamona, naimaci jeacino facaina Jusiñamui ibana oñede. Cai facaina Cristo jai fiodailla jira, cai jeacino facaina Jusiñamui ibana oñeite; iadedi iemona naimiena nabaidicai. Ie jira jeacinona finocana cai jaiño.

8 Cai facaina Cristo fiodailla jira, cai jeacinona fainonocaillanona, Jusiñamui jitailla isoi mai cai i. Jeacinona finocana cai jaiñelli. Uanaicinodo mai cai jailli.

⁹ Jiaie cartana omoimo navui oredicue. Imaci aiñede riñoniai diga itino diga nabairiñellena lloticue. Naiñaiñuai iniñede iñiaai diga itañaiñuai diga nabairiñellena lloticue.

¹⁰ Nibai iena raise cacaiñedomoi. Ie jira iena dane lloticue. Cristona ñnoñedinona ñaiñedicue. Naimaci aiñede riñoniai diga ia, naiñaiñuai iniñede iñiaai diga ia, naimaci rana nicidoia, rana naimaci fiia, jiraraina naimaci sedajia, naimaci diga omoi nabairiñenana ñaiñedicue. Iena rairuiñedicue. Iena cue rairuidicuedena, naganomo Jusiñamuina uiñoñedino illa jira, ¿nino mo niadedi iticai?

¹¹ “Cristona ñnoticai” raitinona ñaiticue. Naimaci aiñede riñoniai diga naimaci ia, naiñaiñuai iniñede iñiaai diga naiñaiñuai ia, rana naimaci nicidoia, jiraraina naimaci sedajia, jiaie cominina naimaci jeare ñaia, naimaci jifaicabia, rana naimaci ficabia, naimaci diga nabairiñeno. Naie isoidino omoi jofuemo feiñoñeno.

¹²⁻¹³ Cristona ñnoñedinona ñaiñedicue. Naimaci rafue cuemo duiñede; iadedi maraiñedicinona naimaci finoia, Jusiñamui naimacina duere finoite; iadedi Cristona ñnotino maraiñedicinona finoia, naimacimo riire llono. Omoi motomo ite jearede rafuena finodimiena omoi rocabillacomo bia, naimie fo billana rairui.

6

Cristona ñnoñede juezmo jiaie creyentena llogidoño

¹ Jiaie omoi finoca rafuena fididicue. Jiaie creyentedimie diga omoi nicino ia, ¿bue ñellena jiaie creyentiaai dine jaiñedomoi, naicinona siadollena?

¿Bue ñellena Cristona ñnoñede juez dine naimiena meiruiñeno llogidotomoi?

2-3 Jesucristo abido bille mei, Cristona ñnotinodicaidi Cristona ñnoñedinona duere sefuillena lloiticai. Taife comini duere sefuillicinona ico jia lloiticai. Iena uiñotomoi. Naimacimo omoi ico llua jira, ¿bue ñellena birui omoimo ite rafuena dani omoi raise finonidomoi?

4 Nicino omoimo ia, ¿bue ñellena Cristona ñnoñedino dine jaidomoi? Omoimona naimaci jamai bue isoidimaci. Naie isoide jueces omoimo ite rafuena raise uiñoñedimaci.

5 Omoi meidallena, iena omoimo jai lloticue. Naie nicinona raise omoi siadollena, iena raise finollena, omoimona nibai damie ite, iena raise finollena.

6 Iese finocabiñedomoi; iadedi nicino omoi creyentiaimo ia, Cristona ñnoñedimie mo jiaie creyentena llogidocabitomoi.

7 Jiaie creyentena omoi llogidoia, Cristo dibeimo raise iñedomoi. Naicino raise omoi finoñenia, uai oñeno anamo ee. Naimiemona omoi duere sefuia, dama ite.

8 Iese iñedomoi; iadedi dani conini jiaie creyentiaina duere finocabidomoi. Naimaci rana fiidomoi. Omoi amana duere finodomoi.

9 Jusiñamui sedajanomo naimiena ñnoñedino duiñeitimaci. Naimaci isoi nia iacadomoi; iadedi Cristo dibeimo omoi illa jira, naimaci isoi inidomoi. Ie jira naimaci illamo omoi abina rairui. Bie isoidino Jusiñamui ie cominina sedajanomo jaca duiñeitimaci: imaci aiñede riño diga itino, imaci iniñede ima diga itino, jiraraina sedacabidino, daje isoide ima diga

conima aifiedotino, daje isoide riño diga coninho aifiedotino,

¹⁰ rana bainino ficabidino, rana nicidocabitino, jifaicabidino, jiaie cominina jeare ñaicabitino, cominimona rana bairodino. Nana naie isoidino Jusiñamui ie cominina sedajanomo duiñeitimaci.

¹¹ Omoimona dajerie iese jaie itomoi; iadedi jiaie rafuedo birui jaidomoi. Cai Nama Jesucristo fiodailla jira, Jusiñamuidi omoi jeacinona jai oni dotade. Iena jai faitate. Ie Joreño uaido omoina ie cominina jai jaitate. Ie muidona naimiemona jai marebicaidomoi.

Jearede rafuemona abina rairui

¹² Cristo dibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiai iena finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Dajerie rafuena cai finocabiñelli, naie rafue anamo cai i raillano. Dani Cristo rafue anamo cai illi.

¹³ Raitomoi: “Ñie isoide guille cai guiacania, ñie isoide rafue cai finoacania, caimona mare” raitomoi. Ero, diga rafuena finoredicai. Naiemona jeacino cai oñena jira, aimetaia, guiredicai. Jusiñamuidi cai aimetaillafue ico saitaitate. Dajerie rafuena cai finoñena, naiemona jeacino cai ua jira. Jearede rafuena cai finoñellena, Jusiñamui caina finode. Cai aiñede riño diga cai illena, caina finoñede. Cai iniñede ima diga cai illena, caina finoñede. Cristona cai iobitallena, caina finode. Naimie jitaillacinona cai finollena, Cristo caina canoite.

14 Cristo fiodaite; iadedi fiodaillamona, Jusiñamui na ie abi diga naimiena jillotate. Cai fiodaia, ie uaido na cai abiai diga caina ico jillotaite. Cai abi jaca illa jira, jearede rafuena birui cai finoñena.

15 Cristomo jainaiidicai. Iena uiñotomoi. Omoi ainaiñede riño diga omoi ia, naiñaiñuaimo jai duidomoi. Cristo naie isoide riñomo jaca duiñena jira, naiñaiño diga iñeno.

16 Ie aiñede riño diga bu ia, ie ai illa isoi, jai dajena jaidiaimaiai. Ie jira Jusiñamui jaielote: “Riño diga iima illa jira, jai dajena jaidiaimaiai” lloite.

17 Cai Nama Cristomo bu duia, dajena jai jaidiaimaiai. Jusiñamui Joreño iaimaiaimo illa jira, iaimaiai comeci dajelote isoi jai lloide.

18 Ie jirari naie jearede rafuemona abina rairui. Iesede bu finoia, jearede rafue ie abimo jai finode. Caimanide rafue ie abi diga finode. Jiaie maraiñede rafue bu finoia, naimie abimo jearede rafue finoñede.

19 Naimiemo omoi duillanona, Jusiñamui Joreño omoiimo illana uiñotomoi. Ie illanodi omoi creyentiai. Jusiñamuimo jai jainaiidomoi. Ie muidona omoi jitaillacinodo jaiñeno.

20 Omoi jeacino facaina Cristo fiodailla jira, Jusiñamui cominina jai jaidomoi. Ie jira omoi finoca rafuemona Jusiñamuina eo iobita.

7

Pablodi iima ie aina ua rafuena ñaite

1 Dajerie rafue cuemo jicanollena, carta cuemo navui oredomoi. Iena ja ñaiticue. Iima ie aina uana

jicanotomoi. Faídaima jaca dama iacania, cuemona mare. Faídaiño jaca dañó iacania, cuemona jiai mare;

² iadedi jeacino omoi finoí raillano, nagamie ie aina otena, jiai mare. Nagañaiño ie inina otena, jiai mare.

³ Naga ini ie ai diga iniacania, naimiemona naiñaiño ie abina caidiñena. Naga ai ie ini diga iniacania, naiñaiñomona naimie ie abina caidiñena.

⁴ Naiñaiño abi dañóñede; iadedi dañó ie ini abimo jiai duide. Naimie abi damañede; iadedi dama ie ai abimo jiai duide.

⁵ Ie jira: “Danomo iniñeiticoco” lloñeno. Jusiñamui diga o raise ñaillena, naimiemo o comecina raise o facallena, iemo omico comeci daje isoi lloillamona, diga irui illamona danomo omico iniacaiñenia, jiai mare. Naie facaise fuilla meinomo riño diga o iacanamona, dane danomo ini, Taife omicomomo ramo fai raillano.

⁶ Dane lloiticue. Jeacina omoi finoí raillano, nagamie ie aina otena, mare. Nagañaiño ie inina otena, jiai mare. Iese omoimo lloiticue; iadedi iese ocuiñedicue.

⁷ Ainidicue. Cue illa isoi omoi illana jitaidicue; iadedi daje isoñedicaí. Jusiñamui caina itataja diese iese iticaí. Dajerie ainidimaci. Dajerie airedimaci. Dajerie ininidimaci. Dajerie iniredimaci.

⁸ Nia ainidinomo lloiticue. Nia ininidinomo lloiticue. Feciñuaimo jiai lloiticue. Ainidicue. Cue illa isoi omoi iacania, cuemona mare;

⁹ iadedi omoi ocuiñeniadedi, aina ono. Jiaie riño diga illemo o comecina facañellena, daje riño

ono, o aina. Jiaie imamo o começina facañellena, daje imana ono, o inina.

¹⁰ Creyentiammo nia lloiticue. Airedinomo lloiticue. Iniredinomo jiaí lloiticue. Cue uaido lloñedicue; iadedi cai Nama jaie llote: “Riño ie inina sofeñeno.

¹¹ Fima ie aina sofeñeno” llote. Iese llote; iadedi nie riño ie inina sofeia, jiaie imana naiñaiño oñena. Fimana naiñaiño oiacania, ie ini diga dane abido illasa.

¹² Nia lloiticue. Cai Nama buena jaie lloñede; iadedi iena birui cue lloiticue. Omoí nairaimona creyentena damie jaide; ia naimie ai creyentena nia jaiñede. Naimie creyentena illa jira, naimie diga naiñaiño nia iacania: “Naiñaiñoña dotaño” naimiemo llono.

¹³ Omoí nairaimona creyentena dañaiño jaide; ia naiñaiño ini creyentena nia jaiñede. Naiñaiño creyentena illa jira, naiñaiño diga naimie nia iacania: “Naimiema dotaño” naiñaiñoño llono.

¹⁴ Ie ini nia creyentena jaiñenia, ie ai creyentena illamona, naimie diga naiñaiño nia iacania, jeacina finoñede. Ie ai nia creyentena jaiñenia, ie ini creyentena illamona, naiñaiño diga naimie nia iacania, jeacina finoñede. Naie creyente muidona, naie iaímaiaí uruiaia, jiaie creyente iaímaiaí uruiaí isoi, omoí roracomo feiño.

¹⁵ Ie inina creyenteñede ai sofeiacania: “Naiñaiñoña dotaño” naimiemo llono. “Naiñaiño jaillena rairuiño” naimiemo llono. Ie aina creyenteñede ini sofeiacania: “Naimiema dotaño” naiñaiñoño llono. “Naimie jaillena rairuiño” naiñaiñoño llono. Sofeia mei, jai

dajemo duiñediaimaia. Jusiñamui naga creyente uri illana jitaide;

¹⁶ iadedi ie ini diga ie ai fiebia, ie ini creyentena mona, naiñaiño nibai creyentena jaite. Ie ai diga ie ini fiebia, ie ai creyentena mona, naimie nibai creyentena jaite.

¹⁷ Iena lloticue; iadedi Jusiñamui mona ie feiñoga uaido nagamie jailla. Creyentiaina omoi jailla facaiseconi, omoi maijuilla ramo nia raise omoi maiji. Naga creyentiaia illanomo buena llofuecabiticue.

¹⁸ Nia creyentiaina omoi jaiñenia, judúua isoi omoimona dajerie omoi abiaina detatato moi. Naie detatafuemo omoi comeciaina birui facañeno. Omoimona dajerie omoi abiaina nia detatañedomoi. Iemo omoi comeciaina birui facañeno;

¹⁹ iadedi Jusiñamui uaina omoi ñnuamo omoi comeciaina birui faca. Jiaie rafue baifemo faite.

²⁰ Creyentiaina omoi jailla facaiseconi, omoi maijuilla ramo nia raise omoi maiji.

²¹ Creyentiaina omoi jailla facaise omoimona dajerie patrón anamo itinodomo. Nia patrón anamo itino isoi omoi jai. Iemo omoi comeciaina jarire facañeno. Jiairuido omoi patrón: “Cue anamo iñedomoi” raia, naimie anamona oni omoi jai; iadedi Cristo rafuedo jaca omoi jai.

²² Cristona omoi ñnua facaise, patrón anamo omoimona damerie navui itomo; iadedi Jusiñamui omoina fetode. Naimiena omoi ñnuamona, omoi jeacino anamo jai iñedomoi. Patrón anamo omoimona damerie navui iñedomoi; iadedi Jusiñamui omoina fetode. Ie

jira naimie anamo jai itomoi.

²³ Omoi jeacino facaina Jesucristo fiodailla jira, Jusiñamui omoi jeacinona oni dotade. Iena jai feitate. Naimie cominina jai jaidomoi. Ie jira comini jitaillacino anamo iñeno; iadedi Jusiñamui jitaillacino anamo i.

²⁴ Cue amatiai, creyentiaina omoi jailla fa-caiseconi omoi maijuilla ramo nia raise omoi maiji. Jusiñamui omoina canuanona, jearede rana omoi maijiñenia, nie isoide rana omoi maijia, Jusiñamuimona mare.

²⁵ Navui cuemo cartana oredomoi. Faidaiñuai illa rafuena uiñoiacadomoi. Cai Nama naie rafuena jaie lloñena jira, iena birui lloticue. Naimie cuena duenailla jira, naimie uaina inoticue. Ie muidona comini inogamiedicue.

²⁶ Birui duere omoi sefuilla facaise illa jira, omoi illa isoi omoi i.

²⁷ Omoimona bu airenia, naiñaiñona dotañena. Bu ainia, dama ainide. Riñona oñena;

²⁸ iadedi o aina illena ininide riñona o otiodena, jeacinona finoñedio. Omoimona o inina illena ainide imana o otiodena, jeacinona finoñedio; iadedi aina bu ua mei, inina bu ua mei, eo duere maijite. Iese omoi duere sefuiñellena, omoimo iena lloticue.

²⁹ Cue amatiai, biemo omoi comeciaina faca. Jesucristo abido dane billirui iairei ite. Naimie jitailla rafuena omoi raise finollena, omoi ainiamo ite rafuemo omoi comeciaina facaja; iadedi Cristo rafuemo omoi comeciai eo facaja.

³⁰ Omoimona damierie sunaia, damierie caimare ia, iemo omoi comeciaina eo facañeno. Damierie raruiaina ibaia, naieri eo iobiñeno.

31 Omoimona damierie bene ite rana ebiruitimaci; iadedi iemo omoi comeciaina eo facañeno. Iemo omoi comeciaina eo facaia, abi juanide, Cristo rafuena omoi finollena. Cristo rafue nano finuamo omoi comeciaina eo faca.

32 Omoi comeciai jarire iñenana jitaidicue. Nia ainidimie abi juarede, dama Cristo rafuena maijillena. Naimiena iobitaiacade;

33 iadedi airedimie bene ite rafuemo ie comecina facade. Ie aina iobitaiacade. Naiñaiño ite rafuemo naimie comecina facade. Cristo rafuemo ie comecina jiai facade;

34 iadedi mena rafuemo ie comecina eo facallemo abi juanide. Ininidiñaiño abi juarede, daño Cristo rafuena maijillena. Nana naiñaiño comecimona naimiena iobitaiacade; iadedi inirediñaiño bene ite rafuemo comecina facade. Ie inina iobitaiacade. Naimiemo ite rafuemo naiñaiño comecina facade.

35 Aina uana rairuiñedicue. Inina uana jiai rairuiñedicue; iadedi omoi raise illena, naie rafuena lloticue. Cristo rafuedo omoi raise marena jaillana jitaidicue. Dani Cristo rafuemo omoi comeciaina facajana jitaidicue.

36 Ero, omoimona naiñaiño oiacaga imamo ie moo, ie jisa caidiñeno fecaca. Naiñaiño jai moon-
ailla jira, naiñaiño jitailla jira, naiñaiño feca. Fecaia, ie moo jeacinona finoñede;

37 iadedi inina naiñaiño oiacañenia, naimie comeci llumona, ie comecina eo facajamona, ie jisa fecaacaiñenia, jiai mare.

38 Ie jisana fecaia, mare. Cristo rafuena naiñaiño eo maijillena, ie jisa fecañenia, jiai mare.

³⁹ Jiaie rafuena lloiticue. Riño ie ini nia fioldaiñenia, naiñaiño naimiemo jaca duide. Ie ini fioldaille mei, jiaie imana ie ini ifomo naiñaiño oiacania, mare; iadedi creyentedimiena naiñaiño ua.

⁴⁰ Naie feciñodi imana ie inina oñenia, naiñaiño abi juarenite, Cristo rafuena eo maijillena. Ie muidona inirediñaiño baifemo caimare iite.

8

Jusiñamuina eruaide jiraraimo llicisi fecaja rafue

¹ Cuemo cartana navui oredomoi. Jusiñamuina eruaide jiraraimo fecaca llicisina jicanotomoi. Naie isoide llicisidi omoi riana uiñoiacadomoi. Iena ja ñaiticue. Naie jiraraina naimaci navui sedaja jira, omoimona damerie naie isoide llicisi riana: “Maraiñede” raitimaci. Creyentiaimona Jusiñamuina eruaide jirarai jamai rana illa jira, damerie naie llicisi riana: “Mare” raitimaci. Bu iese uiñoia, mare; iadedi iena uiñuamona naimie abi iedoia, naimie comecina raise facañede. Iena naimie ría, jiaie creyentiaimo comecina facañede. Jiaie creyentiaina bu isiruia, naimacimo ie comecina facade. Cristo rafuedo jiaie creyentiai raise jaillana jitaide.

² “Eo abina uiñoticue” ie comecina bu facaia, nia eo raise abina uiñoñede;

³ iadedi Jusiñamuina ua cai isiruillamona, jiaie creyentiaina cai isiruia, jai abina uiñoticaí. Jusiñamui dinena caina jiaí uiñotaacade.

⁴ ¿Niese Jusiñamuina eruaide jiraraimo fecaca llicisina ñaiticaí? “Jusiñamuina eruaide jirarai jaca cajeñenana uiñoticaí” raitomoi. “Jusiñamui jaca dajede. Iena uiñoticaí” raitomoi;

5 iadedi “Monamo diga sedalle ra ite” dajerie comini raitimaci. Jitomana sedacabidimaci. Fivuina sedacabidimaci. “Eniruemo diga sedalle ra ite” dajerie comini raitimaci. Taifena sedacabidimaci. Janabana sedacabidimaci.

6 Iena sedacabidimaci; iadedi cai dani Jusiñamuina sedacabidicai. Naimiedi cai Moo. Naimiedi nana rana finode. Nana cominina comuitate. Cai Nama Jesucristo uaido iena finode. Jesucristo caina jillotate. Naimiena cai sedallena, Jusiñamui caina finode.

7 Jusiñamuina eruaide jiraraidi jamai rana nana creyentiai uiñoñedimaci. Jusiñamuina eruaide jirarai naimaci sedauilla jira, naie jiraraimo birui fecaca llicisi naimaci riia: “Naie jirarai sedadicaï” naimaci começaina facadimaci. Naie rafue naimaci raise uiñoñena jira: “Jecinona finodicaï” raitimaci.

8 Ero, nie isoide llicisi cai riamona, llicisi cai riñenamona, Jusiñamui caina feiñoñede. Naimiena cai inuamona caina feiñoñote. Buena cai riñenia, buena cai riia, jecinona finoñedicaï. Naiemona marecinona jiai finoñedicaï.

9 Naie llicisina riredomoi; iadedi omoi ama nibai Cristo dibeimo raise iñede. Naie llicisi omoi riia, naimiemona jecinona jai finodomoi. “Jusiñamuina eruaide jiraraina omoi nia sedadomoi” raillanomo naimie começina facaite. Iena naimie começina facajanona, Cristo dibeimo raise jaiñeite. Abido danomo naimie dane jaite.

10 Nibai abina uiñotomoi; iadedi Jusiñamuina eruaide jirarai illanomo omoi guillena omoi jailla jira, omoina nia Cristo dibeimo raise iñedimie

ciõia, nainomo jiaí guisaite, comecina facajano: “Cue ama Jusiñamuina eruaide jiraraina nia sedaja jira, naiena jiaí nia sedaiticue”.

¹¹ Omoí ama abido danomo jaia, omoí muidona. Cristo naimie facaina fiodaite; iadedi omoí finoca rafue muidona, omoí ama abido danomo jaite.

¹² Iese omoí finoia, omoí amana jeacinona finotatomoí. Naimie comecina ocuiñotañedomoí. Ie muidona Cristomo jeacinona jiaí finodomoí.

¹³ Cristomo jeacino cue finoi raillano, Jusiñamuina eruaide jiraraimo fecaca llicisina riñeiticue. Cue ama abido danomo dane jai raillano, naie llicisina jaca riñeiticue.

9

Cristo facaina llorainidi naimaci jitailla rana jamai feiñua

¹ Cue jitaillacinona finoredicue; iadedi Jesucristo jai oretagamiena cue illa jira, naimie jitaillacinona finoacadicue. Cuena jaie fetua facaise cai Nama Jesúna ciodicue. Creyentiaina omoí jailla jira, cai Nama facaina cue maijiana uiñotomoí.

² Jiaie comini Jesucristo oretagamiedicuenta nibai uiñoñedimaci; iadedi omoí iena uiñotomoí. Cristona omoí inua jira, Jesucristo cuena oretajana uiñotomoí.

³ Cue llofuiacinona bu uaitaia, iese cue llofuiacinona riidoticue.

⁴ Jesucristo rafue lloraimana cue illa jira, omoí dine cue macaria, cue jitailla rana cuemo jamai omoí illa. Jiaie rafuena cue maijiñena motomona cuemo jamai omoí illa.

5 Cue ai cuemo itena, omoi dine naiñaiño cue diga macaria, coco jitailla rana cocomo jamai omoi illa. Omoi dine jiaie Jesucristo oretagano naimaci ainiairi macaria, omoi dine Jesucristo amatai macaria, omoi dine Pedro macaria, naimaci jitailla rana naimacimo jamai fecauidomoi. Ie jira, ¿niese cue jitailla rana cuemo jamai fecañeitomoi?

6 Jiaie llorainimo naimaci jitailla rana jamai fecacabidomoi; iadedi cue onolli diga cue maijiana nibai nia jitaidomoi. Bernabé ie onolli diga naimie maijiana nibai nia jitaidomoi.

7 Ero, soldadodi ie guille ibañede. Iena jamai feiñote. Naga illimo maijuidimie ie illimo maijide, naiemona naimie guillena. Naga toiniaina sedauidimiedi naimacina sedade, naimacimona ucube ie ollena. Omoi motomo cue maijia jira, cuena omoi nafuia, omoimo Cristo rafuena llocabiticue.

8 Jamai comini uaido naiena llofueñedicue; iadedi Moisés micori ciegafuiaimona iena fueoticue.

9 Naimie micori jaie cueba: “Jusiñamui llote: ‘Jurareta trigo oni juillena saisia, iemona ie guillesa, ie fuena maiñeno. Maiñenia, ie maijia fueмона guite’ llote”. Ie isoide. Omoi motomo cue maijia fueмона cue jitailla rana cuemo jamai omoi illa. Iena Jusiñamui lloia, dama juraretamo ie comecina facañede; iadedi caimo ie comecina ua facade.

10 Cristo rafuena cue llofuecabilla jira, cue llua fueмона cue jitailla rana jamai cue feiñua. Iemo ocuridicue. Ie isoide. Ie illimo bu maijia,

naiemona riarra ollena, nainomo maijide. Iemo ocuride.

¹¹ Omoï motomo Cristo rafuedo omoï raise jailena, navui llofueticue. Ie jira cue jitailla raruiái omoïmona jamaï cue ua.

¹² Omoïmona raruiaina jiaie lloraini feiñocabilla jira, cuemona Cristo rafuena nano omoï cacaja jira, cue jamaï jiaï feiñua; iadedi omoïmona raruiaina jicañedicue.

Cue jitailla raruiái cue ollena, cue onolli diga duere maijidicue. Ie jira nana cue jitailla raruiaina oñedicue. Cristo rafuena omoï cacaiacaiñeni railano, omoïmona raruiaina jicañedicue. Raruiaina cue jicaia, omoï comeciaina nibaï facaitomoi: “Raruiái oiacanano Cristo rafuena naimie llocana uite”. Ie mei Cristo rafuena cacaiacaiñeitomoi. Ie jira omoïmona raruiaina jicañedicue.

¹³ Ero, Jerusalémo judíuai comini Jusiñamuina sedauilla jofo ite. Nainomo naie comini toiniaina atiuidimaci, Jusiñamuimo fecallena. Moisés micorijaiie llua isoi, naimaci jeacino facaina toiniaina fajanona fecadimaci. Nainomo maijuuidino comini atica toiniamonanaimaci rillena, ibajanona ocabitimaci. Iena uiñotomoi.

¹⁴ Ie isoide. Cristo rafuena llorainidi naimaci rafuena ñnotinomona naimaci jitailla rana imaci ua. Cristo iena jai llote.

¹⁵ Omoïmona raruiaina jaca jicañedicue. Raruiái birui cue ollena, bie cartana jiaï cueñedicue. Dama cuemo ite ra diga iiticue. Omoïmona iena feiñoticuedena, meiruioicaida feiñoticue. Omoïmona cue feiñoñena jira, omoï facaina Cristo rafue cue llamona, abina

iedotícue. Raruiái cuemo jamai omoi fecaia, ¿níese abina iedoítícue?

16 Jíaié lloraini rana feiñua isoí cue feiñoia, Cristo rafuena cue llumona abina iedoñeítícue. Jusiñamui cuena oretaja jira, naie rafuena llotícue. Iena cue lloñenia, Jusiñamui cuena duere finoite.

17 Dama cue comeci jitaillamona Cristo rafuena cue lloiacania, Jusiñamuimona ibana feiñoítícue. Dama cue comeci jitaillamona lloñeítícue; iadedi Jusiñamui cuena oretaja jira, iena llocana jaidícue.

18 Ie jira, ¿níese ibana feiñoítícue? Ibana nibai feiñoítícue; iadedi omoímo Cristo rafue cue lloia, cuemona mare. Omoímona cue jitailla rana cue oñenia, cuemona mare.

19 Omoímona raruiaina cue feiñoñena jira, omoi anamo iñeítícue; iadedi dama cue jitaillacinodo jaiñeítícue. Creyenteñedino diga cue nabairillena, Cristo rafuena naimaci raise cacaillena, nana naimaci mare finocana uiga rafuedo jaidícue. Iese jaidícue, ailluena cominina Cristo díbeimo cue itatallena. Iese jaiñeítícuedena, eo janore comini Cristo díbeimo nibai jai itataticue.

20 Judíuai comini diga cue ia, naimaci diga cue nabairillena, naimaci mare finocana uiga rafuedo jaidícue. Cristo díbeimo naimacina cue itatallena, naimaci diga nabairiacadícue. Moisés micori llogacino anamo naimaci illa jira, naie llogacinodo jaidícue; iadedi naie llogacinodo cue jilloitañena jira, naie llogacino anamo iñeítícue.

21 Judíuaiñedino diga cue ia, naimaci diga cue nabairillena, Moisés micori llogacinodo naimaci jaiñena jira, naiedo jái jaiñeítícue. Naimaci mare finocana uiga rafuedo jaidícue; iadedi Jusiñamui

lloga uaido jiai jaidicue. Cristo lloga uaido jiai jaidicue. Naimacina Cristo dibeimo itataiacadicue.

²² Naimaci diga cue nabairillena, Cristo rafuena nia raise inoñedino diga cue ia: “Omoi baifemo Cristo rafuena uiñoticue” raiñedicue. Naimacina iciacaiñedicue, naimacimo jeacinona cue finoi raillano. Naimacina cue isiruillamona, naimacina canoacadicue. Naimacina Cristo rafuena raise inuana itataiacadicue. Nana cominina cue canoacana jira, naimaci mare finocana uiga rafuedo jaidicue. Cue comecina facadicue: “Cue muidona damierie Cristona nibai inoitimaci”.

²³ Cristo rafuena ailluena comini inollena, iese jaidicue. Iena llocana jaidicue. Naimaci inua jira, iobidicue.

²⁴ Ero, dani cai jitaillacinodo cai jaiñena. Iemona omoi fueollena, jiaie uaido lloiticue. Riire aisia rafuena omoi comini jifanoia, raire uicodo ridimie rana ote. Ailluena comini aisidimacimona, damie naie rana ote. Ie isoide. Cristo rafuena inocana mai cai jailli, ico Jusiñamui illanomo monamo ibana nana cai feiñollena.

²⁵ Naga aisidimie riire aisillena, ie abina mairitallena, ie abina eenote. Mairillena, ie abina nagarui jiai facatacabite. Ibana feiñollena, iese finode. Ibana bu oia, dallu iobide. Ero, jeacinona cai finoi raillano, cai abiana cai eenua. Naimie jitaila isoi cai illena, Cristo rafuemo jiai cai facacabilla. Monamo cai rillanona, ibana cai feiñollemo, jaca iobitica.

²⁶ Riire aisiacadimie ebena aisifede. Onolli diga mena iaiaiaia jamai jifanoia, jafaicina jamai ducoñediaiaiaia; iadedi conimana ducoidiaiaiaia. Ie isoide. Cristo rafuedo raise

cue jaiacania, jamai ebena jaiñedicue; iadedi nana cue comecimona iedo jaidicue.

²⁷ Cue comecina raise sedadicue. Dama Cristo rafue anamo iacadicue. Dama iena ñinoiacadicue. Ja muidomo ibana cue feiñollena, iese finodicue. Jiaie cominimo Cristo rafuena llofuecabiticue; iadedi monamo ibana cue feiñollena, cue comecina raise sedadicue. Iemona omoi fueua.

10

Jirara:ina sedañena rafue

¹ Cue amatiaí, bie rafuena feitaño. Cai jaiagai micoriaí finoca rafuemona fueoiticaí. Egipto railla eniruemona naimaci billa mei, jofue iñenanomo naimaci macaria, naie diga naimacina ifollena, Jusiñamuidi monamo uillie itatate. Naie uillie anado nana jaisoidimaci. Jiairede railla monaillai ruica naimaci jaiacania, Jusiñamuidi naie monaillai oni ñaijitate, safefodo nana naimaci ruica jaillena.

² Naie isoide rafue nana naimacimo suillanona, Moisés micori díbeimo raise duidimaci. Naimie anamo itabidimaci.

³ Jofue iñenanomo naimaci illa jira, Jusiñamui nana naimacina ecade. Nainomo guille iñena jira, monamona bite guille rana nana guisoidimaci.

⁴ Nainomo jinui jiaí iñena jira, Jusiñamui llua jira, Moisés micori noficina butajamona, toide jinuína nana jirodimaci. Naimaci ñine macaria, Cristona cioiñedicue; iadedi naimaci diga naimie jaca ite. Naimaci diga naimie illa jira, nana naimaci facaina, diga siño rafuena finocabide;

5 iadedi Jusiñamuina naimaci ñnoñena jira, naimiedi naimaci diga icirite. Naimaci diga naimie icirilla jira, jofue iñenanomo Jusiñamui ailluena naimaci micoriaina fiodaitade.

6 Cai jaiagai finoca rafuemona cai fueua. Maraiñede jearede rafuena naimaci finua isoi ebiruiño. Abimo omoi oño.

7 Jusiñamuiñedimiena sedaño. Cai jaiagaimona damerie juraretana eruaide rana jaie sedajano raitimaci: “Bie radi cai Jusiñamui”. Rafuena finodimaci, naie rana sedallena. Eo gutimaci. Ie mei iraisitimaci. Ie jira Jusiñamui naimacina duere finode. Naimaci finoca rafue isoi abimo omoi oño. Jusiñamuiñedimiena omoi sedaño.

8 Naimaci jearede rafuena finodimaci. Naimacimona damerie naimaci aiñede riñoniai diga itimaci. Ie jira naimacimona daruidemo veintitrés mil comini fiodaitimaci. Jusiñamui naimacina fiodaitade. Naimaci finoca rafue isoi abimo cai oño.

9 Cai jaiagaimona damerie Jusiñamui Joreña ñaitimaci. Naimaci guisoiga radi Jusiñamuijona bite. Naiena ñiamona, Egiptomo ite guillemo comeciaina facadimaci. Ie muidona naimiena ricaitadimaci. Ie jira Jusiñamuidi jaioniaina naimacina ainitate. Iemona ailluena fiodaitimaci. Naimaci finoca rafue isoi abimo cai oño. Jusiñamuina ricaitaño. Cristona cai nia ñnoñena facai finoca rafuemo cai comeciaina facaño.

10 Cai jaiagaimona damerie Jusiñamui facaina lloraini joreñaia ñaitimaci. Ie jira Jusiñamuidi ie jaienicina oretate, naimacina meinetasillena. Naimaci finoca rafue isoi abimo cai oño. Jusiñamui facaina lloraini joreñaia cai ñaiño.

11 Nana naie rafue naimacimo suide. Cai facaina Moisés micori iena jaie cuete. Iemona birui cai fueua, naimaci isoi cai fino raillanona.

12 Naie isoide rafue omoimo suiñellena, omoi abiaina rairui. Omoi comeciaina nibai facadomoi: “Cristona cai eo raise inua jira, iena finoñeitica” comeciaina facadomoi; iadedi omoi abiaina omoi rairuiñenia, jeacinona finoitomoi.

13 Taife ramo omoimo faicabilla isoi, nana jiaie creyentiaimo ie isoi ramo faicabite. Iena feitaño. Jusiñamuidi inogamie. Ie muidona omoi comeciai ocuillacino baifemo Jusiñamuidi Taife omoimo ramo faiana rairuite. Naiemona omoi jilloillena, Taife uai omoi inoñellena, Jusiñamuidi omoina canoite.

14 Cue amatai, Jusiñamui omoina canuamona, Jusiñamuiñedimie facaina finoca rafuemona oni i.

15 Abina uiñotomoi. Ie jira omoimo cue lluacinona omoi cacaja mei, iemo omoi comeciaina omoi faca.

16 Ero, Cristona cai sedallena, roracomo danomo oficabidicai. Naimie fiodailla rafuena cai comecillena, janore vino jiruanona, janore llomeniconona guiticai. Jusiñamuimo iobillacinona nano fecadicai. Ie mei janore vino jirodicai. Iena cai jiruamona, Cristona cai nabaillana uiñoticai. Cruzmo Cristo fiodailla jira, naimiena nabaidicai. Naie facaise llomeniconona cai tairuñuamona, naimiena cai nabaillana uiñoticai. Cristo fiodailla jira, iese iticai.

17 Diga creyentiaidicai; iadedi daje llomenicomona jaca guiticai. Daje llomenicomona cai guilla jira, dajena Cristomo cai duillana uiñoticai.

18 Ero, judíuai railla cominimona cai fueua.

Naimaci jeacino facaina iba oñellena, toiniaina faja mei, Jusiñamuimo fecacabidimaci. Ie mei iena ritimaci. Iena naimaci riamona, Jusiñamuina nabaidimaci. Jusiñamuina iobitadimaci.

19 Omoi illanomo Jusiñamuina ñnoñedinodi Jusiñamuina eruaide jiraraimo guillena fecacabidimaci. Cai creyentiaidicaimona naie guilledì jamai guille. Naie jiraraidì jamai ra. Cajeñede;

20 iadedì Jusiñamuina ñnoñedinomona jamai rañede. Naimacimona nanoca ra. “Iemo rille cai fecajia, cai moona sedadicaì” raitimaci; iadedì naie ramo naimaci comeciaina facañedimaci; iadedì imaci moomo comecina facadimaci. Ero, Jusiñamuiñedimie mo comecina fecadimaci. Taifemo naie guille fecacabidimaci. Taifena iobitadimaci. Jusiñamuimo fecañedimaci. Naimaci diga omoi jaia, Taife diga jai nabairitomoi. Taife diga omoi nabairillana jitañedicue. Taifemo omoi duillana jitañedicue.

21 Rollena omoi ofia, Cristo fiodaillana omoi comecillena, nainomo omoi jiruamona, nainomo omoi guillamona, Cristona nabaidomoi. Comini rafue dine omoi jaillamona, Taifena nabaidomoi. Cristo diga, Taife diga, daje facaina nabairinidomoi. Iese omoi finoia, marañede.

22 Iese omoi finoia, Jusiñamuina jai iciritaitomoi. Naimiena omoi icia, ¿ñiese naimie ricai llafuemona jilloitomoi? Jaca jilloñeitomoi.

Jiaie creyentiaina canocana cai jailla

23 Ero, Jusiñamui ñibeimo omoi illa jira, ¿ñiese dani omoi jitaillacinodo jaiacadomoi? Diga Jusiñamui rairuiñega rafue ite. Creyentiaì iena

finorede; iadedi dajerie Jusiñamui rairuiñega rafuena cai finoñelli, naiemona bue cai oñena jira. Iena cai finoia, cai amana Cristo dibeimo itatañedicaí. Iena cai finoia, cai amana Cristo rafuena ñnotacana jaiñeiticaí. Naimiena ramo faicana uitataticaí.

24 Omoimona nagamié dama naimiemo ite rafuemo comecina facañena; iadedi naga jiaie creyentemo ite rafuemo ie comecina jiaí facaja.

25 Ero, ninena o llicisina omoi ibaia, Jusiñamuiñedimiemo naie llicisina fecajana jicanoñeno; iadedi jicanoñeno iena jaricitaiñeno rino.

26 Iena David micori jaie cuega: “Jusiñamui bie eniruena finode. Nana rana finode. Cai guillena, cai guille rana nana comuitaga” cuega. Ie jira ¿niese fimaiticaí? Naimie mare finoca rana cai ríia, jeacinona finoñedicaí.

27 Ero, naimie diga o guillena Cristona ñnoñedimiedi ona uaidoia, naimie dine o jaiacania, naimie dine guisai. Nana omo ecaja guillena guiño. Jamai uainino guiño. “¿Ninena ibadio bie llicisina?” jicanoñeno. O comeci jarire finoñeno;

28 iadedi Cristona raise ñnoñedimie nainomo jiaí gutemo, omo lloia: “Bie llicisidi Jusiñamuiñedimiemo jai fecaca llicisi”, iena o riñeno. Iena o ríia, Cristona raise ñnoñedimie comecina facaite: “Jecinona finodio. Taifemo fecaca llicisina ritio. Creyentedimie iena riñede” comecina facaite. O isoi naie llicisimo naimie comecina facañede. O raitio: “Naie llicisidi jamai llicisi” raitio; iadedi naimie raite: “Naie llicisi Taife

ie” raite. Ie jira naie creyentena o canollena, naiena riñeno.

²⁹ Naimie começina facajacínodo cai jaiñenamona, nana Jusiñamui comuitaga guillena guiredicai; iadedi Cristona nia raise ñnoñedimiemona nana guinidicai; iadedi naimie começina facajacínodo jaiñedicai.

³⁰ Cai guia, Jusiñamuimona naie guille comuitaja jira, Jusiñamuimo iobillacínona fecadicai; iadedi cai guillamona damierie cai joreñona ñaiamona, iena guiñeiticai.

³¹ Omoimo iena nia lloiticue. Nie isoide rana omoi guia, nie isoide rana omoi ríia, nie isoide rana omoi jiroia, nie isoide rafuena omoi finoia, naieri Jusiñamuina iobita.

³² Jusiñamuina nia ñnoñedino canocabi, naimie uaina naimaci cacaillena. Jusiñamuina jai ñnotínona jiai canocabi, naimaci abido danomo uaiñellena.

³³ Buena cue finoia, nana cominimo cue começina facadicue. Ie jira nagarui cue jitaillacínodo jaiñedicue; iadedi Cristo rafuena naimaci ñnollena, nana cominina canocana jaidicue.

11

¹ Cristo lloga rafuedo jai jaidicue. Cue isoi omoi jai.

Roracomo riñoniai illa rafue

² Cuen a nia feitañedomoi. Cristo oretagano jaie llogacínona omoína llofueticue. Cue llofueuil-lacínodo nia jaidomoi. Ie jira omoiri iobidicue;

³ Iadedi jiaie rafuena nia lloiacadicue. Cristo ie Moo anamo ite. Naga iima Cristo anamo jiaie ite. Nagamie ai ie ini anamo ite. Omoi afemo itino uaina omoi inoñenia, maraiñede.

⁴ Roracomo omoi comini oficabia, ie ini anamo ie ai illa jira, omoi comini finocabilla isoi, naga riño ie ifogimo iniroina bicuano jailla. Iese naiñaiño bicoñenia, ie ini anamo naiñaiño iñede isoi eruaide. Jusiñamui diga nie iima ñaia, Jusiñamui uaina nie iima jino lloia, naimie ie ifogi icona jitañeno, Cristo anamo naimie illa jira. Naie facaiseconi ie ifogi icona jitajia, Cristo afemo itena eruaide.

⁵ Nie riño Jusiñamui diga ñaia, Jusiñamui uaina nie riño jino lloia, ie ifogimo iniroina bicoñeno jaia, iima isoi naiñaiño iacana jira, ie ini afemo illana eruaide. Ie ini anamo iacaiñena jira, ie inino meidaitade.

⁶ Nie riño ie ifogimo iniroi bicoñeno jaiacania, iima isoi eruaillena, ie ifogidi rijiruda gareca. Iemona naiñaiño meidaillamona, ie ini anamo illamona, ie ifogimo iniroina bicuano naiñaiño jaite.

⁷ Jusiñamui diga naimie ñaia, Jusiñamui anamo naimie illa jira, iima ie ifogi icona jitañena. Jusiñamui naga iimana comuitate. Iimana naimie finuamona, naimiena cai iobitajamona, Jusiñamui cai afemo illana uiñoticaie. Ie inina iobitajamona, naiñaiño afemo ie ini illa jira, riño ie ifogimo iniroina bicuana jailla.

⁸ Ero, Eva micorimona Adán micori comuiñede; iadedi ie ini micorimona ie ciraiofemona naiñaiño micori comuide.

⁹ Naiñaiño anamo illena naimie comuiñede; iadedi naimie anamo illena naiñaiño comuide. Naimie uai inollena, naimiena canollena,

naiñaiño comuide.

¹⁰ Ie ini anamo naiñaiño illa jira, riño ie ifogimo iniroina bicuano jailla. Naiñaiño iese ia, naiñaiño na naimaci cianona, Jusiñamui jaienisaïmona jiaï mare.

¹¹ Naga riño ie ini anamo ite; iadedi Cristona cai inua jira, riño baifemo imadi faiñede. Ima baifemo riño jiaï faiñede; iadedi daimaiaï conimana iaïmaiaï canua. Cristo naga imana, naga riñoña daje isoi feiñote.

¹² Naga comini Jusiñamui comuitaga. Nano fa-caiseconi Adán micorimona Eva micorina jaie comuitate; iadedi birui naga ima riñoña comuide.

¹³ Biemo omoi comeciaina omoi faca: Omoi roracomo Jusiñamui diga nie riño ñaia, omoi einamacï finocabilla isoi, ie ifogina bicoñoño jaia, ¿ñiese omoi comeciadi raite? Cue comeci: “Maraiñede” raite. Ie ini anamo naiñaiño iñedena eruaide.

¹⁴ Nana omoi biesedena raicabitomoi: “Nie ima ie ifotirai eo areniadedi, cai cominimona maraiñoño cide;

¹⁵ iadedi nie riño ifotie eo arenia, mare” raicabitomoi. Naiñaiñuaï ieri iobidimaci. Jusiñamui iena sicotajamona, naiñaiño ifotie ie ifogina raise ibaide.

¹⁶ Iena jaca llofuecabiticue. Jiaie creyentiaï illanomo cue isoi comeciaina lloidimaci. Omoimona bu cue llogacinona uaitaïacania, damamei ite.

Cristo fiodailla rafuena raise comeciñedimaci

¹⁷ Jiaie rafuena lloiticue. Omoi maraiñede finocabilla rafuena jai fididicue. Cristona sedallena omoi oficabia, Cristo rafuena inocana

jaiñedomoi; iadedi naiemona maraiñede rafue comuide.

18 Rollena omoi oficabia, omoi comeciaina daje isoi lloiñenana jai fididicue. ¿Bue ñellena omoi comeciaina daje isoi lloiacaiñedomoi? Naie rafuena omoi diga ja ñaiacadicue. Omoi oficabia, nagamiai guillena aticabidomoi. Mare; iadedi danomo guiñedomoi. Omoimona damierie ucuberena jira, dueredino diga guiacaiñedomoi. Omoi guille caididomoi.

19 Omoi iese illana jitaiñedicue; iadedi daje isoi omoi comeciaina lloiñenamona, Jusiñamui ðibeimo raise itinodi uiñoga. Omoimona damierie danomo omoi guillamona, Jusiñamuina omoi isiruillana uiñoticaí.

20 Cristona sedallena omoi oficabia, guitomoi; iadedi vino jiruanona, llomeniconna guillanona, cai Nama fiodailla rafuena raise comeciñedomoi. Maraiñede rafuena omoi finua jira, iena nia lloiticue.

21 Nagamiai guillena aticabidomoi. Dani coniniri raise guiñedomoi. Danirie omoi atica guillena guitomoi. Jiaínona guillena iñedomoi. Damierie omoimo ailluena guille ite. Damierie omoimo guille raise iñede. Jiaínona guillena omoi iñena jira, damierie jaca aimetaitimaci; iadedi jiaíno monidimaci. Damierie guilla motomo jiaí jifaidimaci. Coniní nabaiñedomoi. Ie jirari Cristo fiodailla rafuena raise comecinidomoi.

22 Ero, omoi jofue ite, jamai guillena. Omoi oficabia, ¿bue ñe guillaredomoi? ¿Bue ñe jiaínomo guille feacaaiñedomoi? Jiaíe creyentiaina omoi isiruiñenamona, Jusiñamuina jiaí isiruiñedomoi.

Janore guille itinona duere finodomoï, naimacina omoï ecaacaiñena jira. Iese omoï illa jira, omoïri iobiñedicue.

Cristo fiodailla rafuena llofuiacino

²³ Navui omoïna biena llofueticue; iadedi omoï raise ñnoñena jira, iena dane llofueiticue. Cai Nama iena cuemo jaie llote. Cai Nama Jesús ie gaitatarui facaiseconi, ie llofueoicaigano diga ia, naimaci guia, llomeniconona llinote.

²⁴ Iena llinuanona, Jusiñamuimo iobillacinona fecade. Ie mei iena taiñuanona raite: “Mai, biena guiño. Bie llomenicodi omoï guillamona, cue fiodaillana omoï comeci. Cue fiodaillemona omoï jeacinomona jilloitomoï. Biena omoï guillamona cuena comeci. Bie llomenicodi cue abi facai ie. Cue llua isoi iena omoï finocabi” raite. Ie mei iena guitimaci.

²⁵ Ie mei jiroracomo jai totaca vino Jesús llinuanona, Jusiñamuimo iobillacinona fecade. Ie comecina facade: “Adán micori facaisemona cominina imaci jeacino facaina Jusiñamui duere finoñellena, toñiaina atiuidimaci, naimiemo fecallena”. Iemo ie comecina facajano, raite: “Cue fiodaillemona, dama cue diaillemona, Jusiñamuidi omoïmo jiaie rafuena birui llote. Omoï jeacinona oni dotajana llote. Bie vinodi naie rafue facai ie. Cue llua isoi, bie vinona omoï jiruamona, cuena comeci. Mai, iena jiro” raite. Ie mei jirodimaci.

²⁶ Naga icaiño Cristo facaina llomeniconona omoï guia, Cristo facaina vinona omoï jiroia, omoï jeacino facaina cai Nama fiodaillana uiñotomoï. Naimie nia abido dane bille dinori naiena comeci.

Cristo fiodailla rafuena raise comeciacadicaï

27 Cristo fiodailla rafuena raise começi. Naie llomenicono Cristo rafuedo raise jaiacaiñedimie ebena guia, Cristo rafuedo raise jaiacaiñedimie naie vino ebena jiroia, iena jamaide. Naimie jeacinomona Cristo naimie jilluana naimie ñnoñena jira, Cristomo jeacinona finode.

28 Jeacino omoï começiamo illamo omoï começaina faca. Jeacino omoï começiamo ia, iena guiñeno. Iena jiroñeno. Jeacino omoï começiamo iñenia, iena guiño. Iena jiro. Jeacino ia, Jusiñamuimo iena llono. Jiaimie diga nicino ia, iena raise fino. Ie mei iena guiño. Iena jiro.

29 Jeacino naimie começimo nia illamona, iena guia, iena jiroia, maraiñede. Naimie jeacino facaina Cristo fiodailla jira, Cristo fiodaillana naimie jai jamaide. Ie muidona Jusiñamui naimiena duere finoite.

30 Ie muidona omoïmona ailluena irareside. Ie jira omoïmona damierie fodaite.

31 Cai começaina raise cai facajamona, jeacinona cai fainonocaia, Jusiñamui caina duere finoñeite.

32 Jusiñamui caina birui duere finoia, caina naimie dibeimo raise illena itataiacade. Jesucristo abido bia, naimiena ñnoñedinona duere finoite. Naimaci diga cai duere sefuiñellena, birui caina duere finode.

33 Cue amatiai, Cristo fiodailla rafuena omoï começillena omoï ofia, daacaiño omoï guillesa, jiaino riñedinona seda.

34 Bu eo aimetaia, jofomo nano guilla. Guilanona omoï ofillinomo bi. Dani coniniri raise omoï guiacaiñenia, Jusiñamui omoïna duere finoi raillano, jofomo guiño. Nana naie rafuena nia

lloñedicue; iadedi omoi dne dane cue ia, iena lloiticue.

12

Cristo facaina raise maijillena, Jusiñamui Joreño naga creyentena canode

¹ Cue amatiai, jiaie rafuena cuemo jai jicanotomoi. Iena ja ñaiticue. Jusiñamui mona diga uaina feiñoticaí. Naimiemona naimie facaina maijia uaina feiñoticaí. Naimie facaina cai maijillena, jiaie creyentiaina cai canollena, naimiemona cai oga uaina ñaiticue. Iena omoi raise uiñuana jitaídícue.

² Ero, Cristona nia omoi ñnoñenia, Jusiñamuiñedimiede jiraraina sedauidomoi. Iedo jaie tainodo jai-jaisoidomoi. Taife iedo omoína jifuate.

³ Ie jira buena omoi raise uiñuana jitaídícue. Jusiñamui Joreño uaido nie creyente ñaia, Jesús Joreñoña jeare ñaiñeite. “Jesúdi Jusiñamui Jitoñede” raiñeite; iadedi Jusiñamui Joreño uaido nie creyente ñaia: “Jesúdi Jusiñamui Jito” raite. “Jesús cue Nama” raite. Naie isoide creyentedi Jusiñamui ie. Naimiemo cacarei; iadedi iese raiñedinona cacareiño.

⁴ Jusiñamui Joreño caimo jai illa jira, Jusiñamui Joreñomona cai maijia uaina oticaí. Naga creyente daje isoi oñedicaí.

⁵ Naga creyente Cristo facaina daje isoide uai diga maijiñedicaí; iadedi Cristo facaina nana maijidicaí.

⁶ Jusiñamuidi diga uai llua motomo naga creyentena maijitate, naimie jitailla rafuena naimaci finollena.

⁷ Jusiñamui Joreño naga creyentemo jai illanona, naga creyentemo ie uaina itatate. Conini naga creyentena naimaci canollena, ie uaina itatate. Iemona Jusiñamui Joreño caimo jai illana uiñoticaí.

⁸ Damierie creyentemo Cristo rafue jino llole uaina itatate. Damierie creyentemo Cristo rafue llofuelle uaina itatate.

⁹ Damierie creyentemo Jusiñamui siño rafue finuana innotaja uaina itatate. Damierie creyentemo duidinona jillotaja uaina itatate.

¹⁰ Damierie creyentemo siño rafuena finua uaina itatate. Damierie creyentemo jino llole uaina itatate. Naimacimo Jusiñamuidi ie rafuena llocabite, jainomo jino lollena. Dajerie creyentemo uaina itatate, nie isoide uaido Cristo rafuena raila lloraima llua uiñollena. Jusiñamui Joreño uaido nie lloraima lloia, iena uiñote. Taife uaido nie lloraima lloia, iena jiai uiñote. Damierie creyentemo naimaci uiñoñega uaido ñaia uaina itatate. Damierie creyentemo naie uiñoñega uai oni dobaiñolle uaina itatate, comini iena raise uiñollena. Iena naimaci nia dobaiñoñenia, iena jiai raise uiñoñedimaci.

¹¹ Naga creyentemo itatate uaina Jusiñamui Joreñomona bite. Naimie jitailla isoi, naga creyentena ie uaina itatate.

Cristomo dajena duidicaí

¹² Cai abimo diga ra ite. Cai jefo ite. Cai uisi ite. Cai onolli ite. Cai eilli ite. Diga ra ite; iadedi cai

abidi jaca dajede. Dajemo duide. Ie isoide. Diga creyentiaidicai; iadedi dajena Cristomo duidicai.

¹³ Dama Jusiñamui Joreñodi dajena Cristomo nana creyentiaidicaidi duidicai. Dajerie judíuaidicai; dajerie judíuaañedicai; dajerie patrón anamo iticai; dajerie patrón anamo iñedicai. Diga nairaiaidicai; iadedi dajena Jusiñamui Joreña nana feiñoticaí.

¹⁴ Cai raise maijillena, cai raise illena, cai abimo diga ra ite. Naga ra dama oni eneno inide. Ie isoide. Cristomo dajena cai duillanona, diga creyentiaidicai; iadedi Cristo facaina dajena maijidicai.

¹⁵ Ero, cai abimona cai eilli nibai facaite: “Onolli isoíñedicue. Onolli cue baífemo faíte. Bie abimo duiñedicue” facaite. Iese facaia, jaca iese iñede. Cai abimo jaca duide. Onolli eilli baífemo faiñede. Dafoconi ite.

¹⁶ Ero, cai jefo nibai facaite: “Uisi isoíñedicue. Uisi cue baífemo faíte. Bie abimo duiñedicue” facaite. Iese facaia, jaca iese iñede. Cai abimo jaca duide. Uisi jefo baífemo faiñede. Ie isoide. Dajena Cristomo omoi duilla jira: “Jiaímie baífemo iticue” raiñeno. Jiaíe creyentena abina uradoíñeno.

¹⁷ Ero, dama uisi cai abimo itena, cai jefo iñedena, jiaíe ra cai abimo iñedena, ¿niese rana cacaiticai? ¿Niese niadedi ra sorillana cacadicai? Ie isoide. Dajena Cristomo omoi duilla jira, naga creyentena jitaidomoi, Cristomo dajena ñnocana omoi jaillena. Jiaíe creyentena uaitañeno.

¹⁸ Jusiñamui cai abimo diga rana comuitate. Naimie jitailla isoi, cai abimo naga rana comuitate.

¹⁹ Cai abimo diga ra iñedena, ¿buedo cajeniticaí?

20 Diga ra cai abimo ite; iadedi jaca dajede cai abi.

21 Rana cai cioillena, cai uisi ite; iadedi cai onolli iñedena, cai ciua rana llinonidicai. Ra feitañellena, cai comeci ite; iadedi cai eilli iñedena, macarinidicai. Ie isoide. Cristomo dajemo cai duilla jira, naga creyentena dajena ñnocana jail-lana jitaidicai. Jiaie creyentemona abina iedoñeno.

22 Naga cai abimo ite rana jitaidicai, raise cai illena. Naga cai abimo ite ra jiaie ra baifemo iñede. Nana daje isoi itena, mare;

23 iadedi dajerie ra ebire eruaillena, cai abi jifollena, iniroina jitadica. Meiruiñellena, cai abi bainillena, iniroina jiai jitadica.

24 Cai uiecomo meiredino iñena jira, iena jifoñedica. Ero, Jusiñamui cai abina finode. Dajerie ra jiaie ra baifemo iñede.

25 Jusiñamuidi naga cai abimo ite ra dajena maijiana itatate. Dajena maijicana jaide.

26 Cai abimona daje ra isireniadedi, nana cai abi daacaiño isirede; iadedi cai abi caimare marena ia, nana iobidica. Ie isoide. Cristomo dajena duidica. Jiaie creyente duere sefuia, naimiena cai canoia, Cristo dibeimo caimare marena itica. Naimiena cai canoñenia, caimare marena iñedica.

27 Ero, caidi naimie cominina jira, Cristomo dajena nagasaiai duidica.

28 Ie jira Jusiñamuidi naimiena ñnotinomona damieriena nano fetuanona, Cristo naimacina oretate, ie rafuena llollena. Ie mei jiaionona fetode, naimacimo ie rafuena llua mei, jiaionomo ie rafuena jino llollena. Jiaionona fetode, ie rafuena llofuellena, cominina ie rafuena raise uiñotallena. Jiaino ie uaina itatate, naimie facaina

naimaci maijillena, jiaie creyentiana naimaci canollena. Damierie creyentemo siño rafuena finua uaina itatate. Damieriemo duidinona jilloitaja uaina itatate. Damieriemo jiaie cominina canua uaina itatate. Damieriemo jiaie cominina sedaja uaina itatate. Ja muidomo damieriemo naimaci uiñoñega uaido ñaia uaina itatate. Iese omoina fetode, naimie facaina dajena nana omoi maijillena.

²⁹ Ero, Jusiñamui nana omoina fetoñede, ie rafuena jino lollena. Damieriena fetode. Nana omoina fetoñede, ie rafuena llofuellena. Damieriena fetode. Nana omoina fetoñede, siño rafuena finollena. Damieriena fetode.

³⁰ Nana omoina fetoñede, duidinona jilloitalena. Damieriena fetode. Nana omoina fetoñede, omoi uiñoñega uaido ñaillena. Damieriena fetode. Nana omoina fetoñede, naie uiñoñega uai jino dobaiñollena. Damieriena fetode.

³¹ Naga creyentemo Jusiñamuidi ie maijia uaina itatate; iadedi damierie uai jiaie uai baifemo ite. Iena omoimo illena, Jusiñamuimo jica; iadedi jiaie rafuena omoi ollena, omoimo lloiticue. Nana jiaie rafue baifemo ite. Jiaie cominina omoi isiruillena lloiticue.

13

Nana jiaie cominina cai isiruillafue

¹ Cai uiñoñega uaido ñaia uaina cai ñaia, Jusiñamui jaenisaí isoi cai ñaia, cominina cai isiruiñenia, jamai ñaiafuena ñaiticai.

² Jusiñamui rafue jino lolle uaina caimo ia, nana Jusiñamui caina uiñotaga rafuena cai uiñoia,

nana Jusiñamuimo ite rafuena cai uiñoia, Jusiñamui siño rafuena finuana cai eo iñoia, cominina cai isiruiñenia, Jusiñamuimona jamai bue isoidicai.

³ Jiaie cominina cai canollena nana caimo ite rana cai fecaia, Cristo rafuena cai lollena cai niadi fioidiacania, cominina cai isiruiñenia, jaca buena oñedicai. Jusiñamuina jaca iobitañedicai.

⁴ Cominina cai isirua, naimaci diga raire iciriñedicai. Naimacina canocabidicai. Naimaciri abina uradoiñedicai. Abina birioicaiñedicai.

⁵ Cominina cai isirua, abina iedoñedicai. Naimacimo cai comeciaina facacabidicai. Cai rana caidicabiñedicai. Naimaci diga iciricabiñedicai. Naimaci caina jeare finoia, ibana ocabiñedicai.

⁶ Cominina cai isirua, naimaci jeare finoca rari iobicabiñedicai. Naimaci uanai mare finoca rari iobicabidicai.

⁷ Cominina cai isirua, naimaci caina duere finoia, ibana ocabiñedicai. Cai joreño bu ñaia, caina taino lloia, iena iñocabiñedicai. Cai marena illamo ocuridicai. Cai comeciaina ocuiñocana jaidicai.

⁸ Jusiñamuidi cominina jaca cai isiruillana jitaide; iadedi caimo ie rafuena jino lolle uaina jaca itatañeite. Naie uaidi ico saite. Caimo cai uiñoñega uaido ñaia uaina jaca itatañeite; iadedi naie uai ico saite. Caimo ie llofuelle uaina jaca itatañeite; iadedi nai uai ico saite.

⁹ Nana Jusiñamui caina uiñotagacinona nia raise cacaiñedicai. Nana Jusiñamui rafuena nia raise jino lloñedicai;

¹⁰ iadedi Jesucristo dane abido bia, Jusiñamui Joreño caimo itataja uaidi saite. Naimie diga cai

illemona naimiena raise uiñoiticaí. Naimiemo ite rafuena jiaí raise uiñoiticaí.

¹¹ Jiaíe rafuedo iena llofueticue. Jaie nia cue uruena, urue isoi ñaiticue. Urue isoi comecina facadicue; iadedi eimiena cue jaillamona, urue isoi jaiñedicue. Cue uruenamona ite rafuena fainonocaidicue. Eimie comecina facajacinodo birui jaidicue. Urue isoi Jusiñamui rafuena birui janore uiñoiticaí; iadedi monamo caí ia, eimie isoi iena raise uiñoiticaí.

¹² Ero, jacaíe acaranimona caí joreñodi raise bainide. Ie isoide. Jusiñamuimo ite rafuena nia raise uiñoñedicaí. Iena raise cacaiñedicaí; iadedi Cristona ico cioiticaí. Naimiemo ite rafuena birui janore cacadicue; iadedi naimie dine cue ria, Jusiñamui cuena jai uiñua isoi, jiaí raise uiñoiticue.

¹³ Ja muidomo lloiticue. Jesucristo billanona, Jusiñamui Joreñomona caímo ite uaidi saite; iadedi Jusiñamui llogacinodo jai abina inoticaí. Naimie llogacino suillemo jai ocuiridicaí. Jusiñamuina caí isiruillamona, jiaíe cominina jiaí isiruiticaí. Naie isiruillacino jiaícino baífemo faite. Ie jira coninina isiruicana omoi jai.

14

Omoi uiñoñega uaido omoi ñaía rafue

¹ Nana cominina isiruicana mai omoi jai. Jusiñamui Joreñomona bite maijia uaina uana omoi nicido. Jusiñamui rafuena jino lolle uaina ua nicido.

² Ero, omoi uiñoñega uaido ñaía uaina omoi ñaicabia, jaca buna omoína cacaiñena jira, cominina canollena ñaiñedomoi; iadedi

Jusiñamuina iobitallena ñaitomoi. Omoi uiñoñega rafuena omoi comeciainona ñaitomoi.

³ Jusiñamui rafuena jino omoi lloia, cominina canodomoi. Naimacina Jusiñamuina inotadomoi. Naimie dibeimo raise itatatomoi. Naimaci comeciaina ocuiñotadomoi.

⁴ Nana creyentiaina canodomoi; iadedi naie uiñoñega uaido omoi ñaia, dani omoi comeciaina canodomoi.

⁵ Rollena omoi oficabia, naie uiñoñega uaido omoi ñaia, cuemona mare; iadedi Jusiñamui rafuena jino omoi lloia, cuemona ua eo mare. Naie jino llua uaidi naie uiñoñega uai baiñemo faite. Naie uiñoñega uaido omoi ñaia, nana creyentia iena raise cacareillena, iena omoi oni dobaiñoia, cuemona jiai mare. Ie mei naie ñaiamona, Jusiñamui rafuena naimaci cacajamona, creyentiaina canodomoi.

⁶ Cue amatiai omoi dine cue jaiacanana uiñotomoi. Omoi dine cue ria, cue uiñoñega uaido cue ñaiticuedena, omoina canoñedicue; iadedi Jusiñamui cuemo jai lloga rafuena omoimo cue lloticuedena, omoina canodice. Jusiñamui rafuena raise cue jai uiñua jira, omoina cue llofueticuedena, omoina jiai canodice.

⁷ Ero, quena jamai tainuaido bu fia, ie figana uiñoñedicai. Guitarra bu jamai tainuaido taia, ie taillana uiñoñedicai.

⁸ Ejércitomo trompetana jamai tainuaido fia, soldaduai maijillena raise uiñoñedimaci.

⁹ Ie isoide. Cai cacaiñena uaido omoi ñaia, omoi ñaiana uiñoñedicai. Iese omoi ñaia, jamai tainona ñaite isoi cacadica.

10 Eo ailluena nairai:ite. Naga nairai ie uai ite dani naimaci ñaillena;

11 iadedi nie nairai ie uaina cue uiñoñenia, naimacimona jiaie nairai imiena eruaidicue. Cue-mona naimaci jiaie nairaina eruaidimaci. Conini diga ñaiana cacaiñedici.

12 Ie isoide. Jusiñamui Joreñomona bite ñaia uaina omoi eo jitaillanona, diga uaina Jusiñamuimo jica, dani conini Cristo rafuena ñnocana omoi jaillena. Jusiñamui Joreñomona dani daje uaina nicidoño; iadedi nana nicido.

13 Ie jira ie uiñoñega uaido bu ñaia, ie oni dobaiña uaina naimiemo illena, jiaie creyentia: iena cacaillena, Jusiñamuimo jicaja.

14 Jusiñamui diga cue uiñoñega uaido cue ñaia, Jusiñamui Joreño cuena ñaitatate; iadedi iena cacaiñedicue. Iena uiñoñedicue.

15 Ie jira, ¿niese cue nibaille? Jusiñamui diga cue ñaia, cue uiñoñega uaido ñaiticue; iadedi comini cue ñaiana raise uiñollena, Jusiñamui diga jamai cue uaido jia: ñaiticue. Jusiñamuimo cue roia, cue uiñoñega uaido roiticue; iadedi comini cue ruana raise uiñollena, Jusiñamuimo jamai cue uaido jia: roiticue.

16 Iobillacinona Jusiñamuimo omoi fecajano, omoi uiñoñega uaido omoi ñaianona, ¿niese omo:na cacaiñedino: “Jee” raitimaci?

17 Iobillacinona Jusiñamuimo raise fecadomoi; iadedi omo:na cacaiñedinona Jusiñamuina uiñotañedomoi. Ie jira omoi uiñoñega ñaia uaina oni dobaiñotimie omoi roracomo iñenia, naie uaido ña:ño.

18 Cue uiñoñega uaido cue ña:cabilla jira,

Jusiñamuimo iobillacinona fecadicue. Omoi bai femo naie uaido cue ñaiana uiñoticue;

¹⁹ iadedi roracomo cue ia, cominina raise cue llofuellena, janore cue ñaiadi, mare; iadedi eo are cue uiñoñega uaido cue ñaia, cominina Jusiñamui rafuena cue llofueñenia, cuemona maraiñede.

²⁰ Cue amatiai, omoi uiñoñega ñaia uaido dani jai jaidomoi; iadedi jiaie Jusiñamui Joreño itataja uaimo omoi comeciaina facañedomoi. Omoi abina jai uiñuamona, jiaie uaimo omoi comeciaina faca.

²¹ Jusiñamui facaina lloraíma micori jaie cueba: “Jusiñamui llote: ‘Cue comini dine jiaie nairaina cue oretajamona, cue cominina cuena ñnotallena, naie jiaie nairai uaido cue cominimo lloiticue; iadedi iena jitaiñeitimaci. Cuena jaca uiñoñeitimaci’ llote”.

²² Ie isoide. Uiñoñega uaido omoi ñaiamona, Cristona ñnoñedino iena raise cacaiñedimaci; iadedi Cristona ñnotino iena cacadimaci. Iemona fueotimaci. Jusiñamui rafuena omoi llofuíamona, Cristona ñnoñedino iena cacajamona, Cristona ñnoñedimaci; iadedi Cristona ñnotinona canodomoí.

²³ Danomo nana omoi ofia, omoi uiñoñega uaido nana omoi ñaia, Cristona ñnoñedino iena cacajanona, omoi na; “Uairico” raitimaci;

²⁴ iadedi omoi ofia, Jusiñamui rafuena omoi jino lloia, iena Cristona ñnoñedimie cacajamona, naimiedi jeacino naimie comecimo illana uiñoite. Naie rafue naimie mo raire baite.

²⁵ Naimie comecimo ite jearede rafue naimie uiñuamona, Jusiñamuimo ie jeacinona lluanona, Jusiñamuina ñnoite. Ie muidona raite: “Uanai, Jusiñamui omoi motomo ite”.

Roracomo omoi ia, raise marena omoi i

²⁶ Cue amatiai, rollena omoi oficabia, ¿niese omoi nibaille? Iena ja ñaiticue. Omoi ofia, omoimona damierie nibai roite. Jiaimie Cristo rafuena llofueite. Jiaimie naimiemo Jusiñamui como lloga rafuena jino lloite. Jiaimie ie uiñoñega uaido ñaite. Jiaimie naie uaina oni dobaiñoite. Cristo dibeimo creyentiana raise itatallena, nana omoi finua rafuena raise fino.

²⁷ Uiñoñega uaido bu ñaia, damie amani naiedo ñaite. Damierie ñaite. Jiaimie ñailla ifomo jiaimie ñaite. Ie mei damie naie ñaiana oni dobaiñoite.

²⁸ Naie ñaiana oni dobaiñotimie iñenia, naie uiñoñega uaido ñaitimie roracomo ñaiñena; iadedi naimie ñaiacania, Jusiñamuimo dama ie jofomo ñaia.

²⁹ Jusiñamuimona ite rafuena bu jino lloiacania, damie amani iena lloite. Damierie lloite. Jiaino llorainidi Jusiñamuimona naie llucino bil-lana uiñuanona llua.

³⁰ Jusiñamui rafuena bu nia lloia, naimie ecimo jiaimiena rafuena Jusiñamui Joreño llotataia, nano llotimie raire llucaila. Iemei jiaimie lloite.

³¹ Iese damierie nana lloitomoi, naie lluamona Jusiñamui rafuena raise omoi uiñollena, omoi comeciai jiai ocuiñollena.

³² Naga llotimiedi ie uiñua diese lluana uiñote. Ie jira jiaimie nia lloia, iena cacarei. Iemei jiaimie llua.

³³ Iese iñenia, daacaiño omoi lloia, buna Jusiñamui rafuena raise cacaiñeite. Omoi raise illena Jusiñamui jitailla jira, omoi uri illena Jusiñamui jitailla jira, cue llucinodo omoi jai.

³⁴⁻³⁵ Jiaie creyentiai illanuaimo isoi omoi

roracomo riñoniaidi uaina uaitañena. Nainomo lloga rafuena nainomo naiñaiñuai siadoñena; iadedi naiñaiñuai jofomo rillanona, naiena ie inimo jicanoitimaci. Roracomo naiñaiñuai ia, Moisés micori jaie llua isoi, naiñaiñuai ini anamo naiñaiñuai illa jira, nainomo ite lloraima uaina naiñaiñuai uaitañena. Roracomo naiñaiñuai uaina uaitaia, marañede, nainomo ite jino lloraima uaina naiñaiñuai raise cacaiñena jira.

³⁶ ¿Niese cue llucinodo jaiacaiñedomoi? Jusiñamui rafue omoimona comuiñede. Dani omoimo naie rafue duiñede; iadedi nana creyentiaimo duide. Dani omoimo Jusiñamui ie rafuena lloñede. Nana creyentiaimo iena llote.

³⁷ “Rafuena Jusiñamui cuemo llote” omoimona ie comecina bu facaia, “Jusiñamui Joreño ie ñaia uaina cuemo itatate” ie comecina bu facaia, “Cai Namamona ite uaina omoimo cueticue” naimiedi uiñote;

³⁸ iadedi naimie iese uiñoñenia, Jusiñamui Joreñomona naimie uai iñenana uiñoiticaí.

³⁹ Cue amatiaí, Jusiñamui omoimo ie rafuena llua uaina naimiemo jica; iadedi naimaci uiñoñega uaido jiaie creyentiaí ñaia, iena rairuiñeno.

⁴⁰ Omoi ofia, cue llua isoi, Jusiñamuina raise marena seda.

15

Fiodaillamona Cristo jai jillode

¹ Cue amatiaí, iena omoi feitañellena, bie rafuena dane lloiticue. Cristo ie mare rafuena omoína navui llofueticue. Fiodaillamona Cristo jilluana llofueticue. Cue llofuiacinona feiñotomoi. Iena inocana jaidomoi.

2 Naiena omoi ñnuamona, Jusiñamui omoi jeacinomona omoïna jillotate. Naiedo nia omoi jaia, iena raise omoi ñnoia, jai jillobidomoi.

3 Nanoca rafuena omoïna llofueticue. Jiaie creyentiaïmona buena jai cacadicue. Jusiñamui facaina lloraini micoriai jaie ciegafuiaï isoi cai jeacino facaina Cristodi fiodaite.

4 Raiafomo naimiedi jonega. Darui amani illanona naiemona Jusiñamuidi naimiena jillotate, Jusiñamui facaina lloraini micoriai jaie llua isoi.

5 Ie mei Pedro naimiena cïode. Ie mei ie once llofueoïcaigano naimiena cïodimaci.

6 Ie mei quinientos naimiena ñnotino naimiena daruido cïodimaci. Naimacimona damierie jai fiodaitimaci; iadedi ailluena nia fiodañedimaci. Cristo jilluana uiñotimaci.

7 Ie mei Jacobo naimiena cïode. Ie mei nana ie oretagano naimiena cïodimaci.

8 Ie mei naimiena jiaï cïodicue. Ie jira fiodaillamona naimie jilluana uiñoticaï. Ie doce llofueoïcaigano fetua mei, diga años illanona, naimiena nia cue uiñoñena facaise cuena fetode. Ie mei ie rafuena cue lollena, cuena oretate.

9 Ailluena creyentiaïna jaie cue duere finua jira, nana jiaie Cristo oretagano cue baifemo faitimaci. Jamai bue isodicue; iadedi Cristo cuena fetode.

10 Jusiñamui cuena duenaillamona, Cristo oretagamiena jaidicue. Jusiñamui cuena jamai tainomo duenañede. Nana jiaie Cristo oretagano baifemo Cristo rafuena llofuecabiticue. Dama cue comecimona llofuecabiñedicue; iadedi Jusiñamui cuena canuamona, iese llofuecabiticue.

11 Jiaie oretagano Cristo rafuena llofueia, iena cue llofueia, daje isoide rafuena llocana jaidicai. Naie rafuena omoi cacajamona, iena ñnotomoi.

Fiodaillamona nana creyentiai ico jilloitimaci

12 Fiodaillamona Jusiñamui Cristona jillotajana llofuecabiticai; iadedi omoimona dajerie rait-omoi: “Fiodaillamona, nana comini imaci abiai diga ico jilloñeitimaci”.

13 Ero, omoi llua isoi fiodaillamona comini ico jilloñedena, ie isoi Cristo jiai nia raiafomo ite. Niade jilloñede.

14 Cristo jilloñenia, Cristo rafuena jai tainona lloticai. Naie rafuena jiai tainona ñnotomoi.

15 Cristo fiodaillamona Jusiñamuidi naimiena jillotajana llofuecabiticai. Fiodaillamona creyentiana ico Jusiñamui jillotañenia, Cristona jiai nade jillotañede. Jusiñamui rafuena tainona jai llofueticai.

16 Fiodaillamona nana creyentiai ico jilloñenia, Cristo jiai jaie jilloñede.

17 Cristo nia jilloñenia, naimiena tainona ñnotomoi. Jusiñamui omoi jeacinona niadedi oni dotañede.

18 Cristona ñnuanona jai fiodaitinodi jiai jai faifidimaci. Jusiñamui illanomo jaca iñeitimaci; iadedi iraimo jaca iitimaci.

19 Nana cai ille dinori dani Cristo caina jilloitallemo cai ocuria; iadedi naimie jilloñenia, jai duere iticai. Jai tainomo ocuridicai.

20 Ero, tainomo ocuriñedecai; iadedi fiodaillamona Jusiñamui Cristona jai jillotate. Naimie jillua mei, naimiena ciodicai. Ailluena fiodaitino jai

itimaci; iadedi Cristo jai jillode. Ie jira nana jai fiodaite creyentia; jiai jilloitimaci.

²¹ Adán micori jeacinona finua jira, fiodaite. Fiodaillamona jilloñede. Jeacino naimie finua jira, fiodaicana jiai jaidicai; iadedi fiodaillamona Cristo jai jillua jira, fiodaillamona ico jiai jilloitica;.

²² Adán micorimona cai comuilla jira, nana fiodaicana jaidicai; iadedi Cristomo cai duilla jira, jilloitica; naimie diga jaca cai illena.

²³ Cristo jai jillode. Cai fiodailla mei, naimiemo cai duilla jira, ico dane abido naimie bille facaise jilloitica;.

²⁴⁻²⁵ Ie mei naimie dinena nana naimie dibeimo iñedinona anafeditaite. Nana naimie dibeimo iñede joreñuaina jiai anafeditaite. Illaimana Cristo illamona, nana naimie dibeimo iñedinona anafeditaite. “O uai cuemo o illamona, nana o jitailla rafuena jai fuidodicue” ie Moomo lloite.

²⁶ Nana naimie dibeimo iñedino naimie anamo jai illa mei, Cristo muidona naimie comini jai jilluamona dane fiodaiñeitimaci.

²⁷ Jusiñamuidi nana cominina Cristo anamo itataite. Ie muidona creyentia;dicai dane fiodaiñeitica; iadedi Cristo anamo Jusiñamui iñeite. Cristona oretaja jira, Cristo anamo Jusiñamui iñede.

²⁸ Naga ra Cristo anamo illa mei, ie maijia fuilla mei, Jusiñamui ie Moona jira, Jusiñamui anamo Cristo jiai iite. Jusiñamui nanocamiëna jira, nana naimie finoca ra naimie anamo iite. Nana comini naimie anamo iitimaci.

²⁹ Cristo jilloñedena, fiodaillamona jilloñeitomoidena, ¿niese bautizagaomoi? Fiodaillamona omoi jilloñenia, ¿bue ñellena

bautizagaomoi? Tainomo jai bautizagaomoi; iadedi iese inoñedomoi. Dajerie creyentiai marena illamona, omoimona dajerie creyentiaina jaidomoi. Naimaci jai fioidaitimaci; iadedi fioidaillamona ico jilluana inotimaci. Iena omoi inuanona, bautizagaomoi.

³⁰ Cristo jilloñenia, cue jilloñediduedena, ¿bue ñellena nagarui Cristo rafuena cue llofuiamona, eo jacirede ramona niadedi fioidaicabiticue?

³¹ Cue amatiai, cai Nama Jesucristomo omoi duilla jira, omoi iobididicue; iadedi nagarui niadedi fioidaicabiticue. Cristo rafuena omoimo cue llocabilla jira, jiaie comini iciritimaci. Icirillamona, cuena meineiacadimaci.

³² Efeso railla nairaimo birui cue illamona, diga comini cue lloga uaina eo uaitaside. Duere sefuidicue. Cristo jilloñenia, cue llamona jaca buena oñeiticue. Ie muidona fioidaillamona cai jaca jilloñeiticaidena, Cristo rafuena fainonocaida, ico raire jamai cai fioidailla jira, jamai ua jai jaicaillafuena cai jaiacaiticai. Ie ia iese inede. Cristo jai jillode.

³³ Ie jira omoi abiaina jifueñeno. “Jilloñeiticai” railla comini diga omoi nabairia, naimaci llogacínodo jiai jaitomoi. Ie muidona naimaci diga nabairiñeno.

³⁴ Ie jira raise abina uinuanona, mai jai. Jeacinona finocana jaiñeno. Omoimona dajerie Jusiñamuina raise uinñena jira: “Jusiñamuidi cominina jillotañeite” raitimaci. Omoi meidallena, omoimo iese llotidicue. Jusiñamui rafuedo raise mai omoi jai.

¿Niese creyentiai jilloitimaci?

³⁵ Omoimona damie nibai jicanoite: “¿Niese fiodaillamona creyentiaidicai jilloiticai? Naimaci abiai nibai jai rifaidimaci. ¿Nie isoide abiai diga dane iiticai?”

³⁶ Iese bu jicanoia, raise comecina facañede. O illimo buena o ria, janore sicua meinoconi, o riga radi jai abidi rifaide.

³⁷ Nie isoide icoñona o ria, nie isoide ijina o ria, nie isoide idona o ria, naie ra sicua mei, jai jiaifo eruaide. O riga rana eruañede.

³⁸ Naga riarra daje isoi eruañede. Jusiñamui jitailla isoi, jiaiforie eruaide. Ie isoide. Naga fiodaitimie jillua mei, Jusiñamui jitailla isoi, ie abina jiaiforie itataite.

³⁹ Diga isoide cai abiaina Jusiñamui jai comuitate. Naga abi isoide ite. Cai maijillena, comini abi ite. Eniruedo macarillena, ocaina abi ite. Fellena, silli abi ite. Jinuimo illena, lliciai abi ite. Ua diga isoide abi ite. Jusiñamuidi cai jiaiforie eruaite abiaina finorede.

⁴⁰ Jusiñamui dine ico cai ia, cai abiai iite, nainomo cai illena. Bene cai abiai jiai ite, bene cai illena. Monamo cai ia, ebireniticai. Bene cai ia, jiai ebire iticai; iadedi daje isoi ebire iñedicai.

⁴¹ Jusiñamuidi monamo ite rana finode; iadedi daje isoi lligaiñoñede. Jitoma fivui isoi lligaiñoñede. Fivui ucuai isoi lligaiñoñede. Naga ucuai daje isoi lligaiñoñede. Monamo cai ico illena, naimie jitailla diese cai abiai caimo iite.

⁴² Ie isoide. Fiodaillamona cai jillua mei, cai abiai jiaifo eruaite. Cai fiodaillamona cai abiai rifaide; iadedi cai jilluamona, cai abiai dane jai rifaiñeite.

43 Cai fiodaillamona cai abiaí jai ebinide; iadedi cai jilluamona, cai abiaí ebirenite. Fiodaicana cai jailla jira, cai abiaí birui raise mairiñede; iadedi ico cai jilluamona, cai abiaí mairite. Nana Jusiñamui jitailla rafuena finoreniticaí.

44 Cai fiodaia, come abiaí isoi caimo birui ite; iadedi cai jilluamona monamo ico caimo cai abiaí jiaí iite. Enirue iena cai abiaí birui caimo ite. Ie jira monamo cai jiaífo eruaite abiaí caimo iite.

45 Adán micori comuilla rafuena Moisés micori jaie cuega: “Jusiñamuidi nano comuidimie dofomo jafaicina firaiñuamona, naimie micori comena jaide” cuega. Naimiemona cai comuilla jira, fiodaiticaí. Fiodaillamona Cristo jillua jira, ico cai jiaí jilloille jira, caina jiaífo eruaite abiaína ico itataite.

46 Eniruemo birui cai illa jira, caimo birui ite abiaí diga iticaí. Fiodaillamona ico cai jillua mei, monamo cai ia, jiaífo eruaite abiaí diga iiticaí.

47 Adán micoridi enirue ie. Imuicimona Jusiñamuidi naimiena finode. Cristodi eniruemo billanona, imana jaide; iadedi Jusiñamui dinena monamona naimie bite.

48 Imuicimona Adán micori finua jira, naimie fiodailla mei, dane imuicina jaide. Naimiemona cai comuilla jira, cai fiodaia, jiaí imuicina jaiticaí; iadedi Cristomo jiaí duidicaí. Cai jillua mei, naimie isoi ico iiticaí.

49 Adán micorimona cai comuilla jira, naimiena eruaidicaí. Eniruemo Cristo jaie ia, naimie abi ite. Fiodaillamona naimie jillua mei, naimiemo jiaífo eruaite abi naimiemo ite. Cai jillua mei, Cristona eruaiticaí.

50 Cue amatiaí, biena lloticue. Caimo jai ite abiaí

diga monamo Jusiñamui ie cominina sedajanomo iñeiticai. Cai abiaí rifaila jira, cai fiodailla facaise naie isoide abiaí diga nainomo jaca iñeiticai.

⁵¹ Ero, Jusiñamui cuena uiñotaga rafuena omoímo ja lloiticue. Iena navui jaca uiñoñedicaí. Nana creyentiaídicaí fiodaiñeiticai; iadedi Jusiñamui cai abiaína jiaífo meidotaite.

⁵² Omoí uisí jarire cuirorilla isoi, iena ua raire meidotaite. Ie trompeta fillanona, jai fiodaite creyentiaína Jusiñamuidi jillotajanona, naimaci abiaína meidotaite. Nia fiodaiñedinodicaí cai abiaína jiaí meidotaite. Dane fiodaiñeiticai.

⁵³ Cai abiaí birui rifaiacade. Ie jira birui fiodaicana jaidicaí. Jusiñamuidi cai abiaína ico meidoite. Ico monamo jiaífo abiaí caímo ia, cai abiaí rifaiñeite. Fiodaiñeiticai.

⁵⁴ Iese caímo suia, Jusiñamui facaina lloraima micorí jaie cuega uai jiaí suite. Cuega: “Nairuimona creyentiaí jaca fiodaiñeitimaci”.

⁵⁵ Cai jaca illa jira, fiodaicana jaiñeiticai. Fiodailana jaciruiñeiticai, dane cai fiodaiñeiticaina jira.

⁵⁶ Jeacino illa jira, birui fiodaicana jaidicaí. Moisés micorí jaie llogacino illa jira, iena cai raise finonina jira, jeacino caímo illana uiñoticaí;

⁵⁷ iadedi cai jeacino facaina cai Nama Jesucristo fiodailla jira, jeacino anamo jai iñedicaí. Cai fiodailla mei, dane fiodaiñeiticai. Jusiñamui caína iemona jai jillotate. Ie muidona naimieri cai iobil-lasa.

⁵⁸ Cue amatiaí, fiodaillamona nana creyentiaí ico jillua jira, Cristo rafuena ñnocana jai. Naganomo iñeno; iadedi Cristo rafuena llocana omoí jai. Naimie jitailla rafuena finocana

omoi jai. Naimie facaina omoi maijia, tainona maijiñedomoi. Naiemona diga mare rafue comuite. Iena jai uiñotomoi.

16

Jerusalémo itinomo ucubena oredimaci

¹ Jiaie rafuena cuemo jicanotomoi. Jerusalémo ite creyentiaimo ucubena oretaiacadomoi. Galaciamo ite creyentiaimo cue llua isoi, omoi mo lloiticue.

² Naga domingo omoi ucubemona daje diese eneno oni eeno. Omoi maijia bailla diese ucubemona cue bille dinori iena eeno. Iese naga domingo omoi eenoñenia, ico cue bia, ¿niese daciño ofrendamo ailluena ucubena joneitomoi?

³ Omoi dine cue rilla mei, omoi eenoga ucubena uillena, Jerusalémo ite creyentiaimo omoi fetocanona oretaiticue. Cartana jiai oretaiticue, omoi fetocano mareuidinona Jerusalémo itino uiñollena.

⁴ Jerusalémo cue comeci jiai jaiacania, cue diga jaitimaci.

Pablo jai macariacade

⁵ Macedonia railla eniruemo nano jaiticue. Creyentiaina cioillena, dajerie nairaimo jaiticue. Ie mei omoi dine jaiticue.

⁶ Diga irui omoi diga nibai iiticue. Nana rollime facaise omoi diga nibai iiticue. Nibai daje amani fivui iiticue. Ie mei cuena omoi canollemona oni jaiticue. Omoi dinomona cue jaia, cue jaillinona nia uiñoñedicue.

⁷ Omoi dine birui nia jaiñeiticue. Omoi dine birui cue jaia, dallu omoi diga iiticue; iadedi jaiaruido

omoi dine cue jaia, cai Nama jitaia, omoi diga are iiticue.

⁸ Beno Efesomo nia iiticue.

⁹ Beno diga comini Cristo rafuena cacaacadimaci. Naimacimo iena llofueiacadicue. Diga comini cue llwana uaitatimaci. Cue llwana jitañedimaci Ie jira bene nia lloiacadicue. Pentecostés railla rafue fülle mei, jaiticue.

¹⁰ Omoi dine Timoteo ria, naimiena raise marena nafue. Cue isoi cai Nama facaina naimie maijicabide.

¹¹ Ie muidona naimie llucinona jamaiñeno. Omoimona naimie jaiacania, cue dine abido naimie raise rillena, naimiena raise cano. Naimie jaiacania, naimie caimare caimaduano oreta. Jiaie creyentiaia diga naimie billemo ocuridicue.

¹² Apolona jicanotomoi. Jiaie creyentiaia diga omoi dine naimie jaillana naimiemo lloticue; iadedi naimie comeci nia jaiacaiñede. Jiairuido abi juarenia, omoi dine jaite.

Fuiduacino

¹³ Jeacinomona abina rairui. Cristo rafuena inocana omoi jai. Eimie isoi omoi comeciaina ocuiño.

¹⁴ Jiaie cominina omoi isiruillamona, nana omoi finoacalle rafuena fino.

¹⁵ Cue amatiaia, Acaya railla eniruemo Estéfanadi, ie comini diga, nano creyentiaidimaci. Iena uiñotomoi. Naimaci jitailla jira, jiaie creyentiaina canocabidimaci.

¹⁶ Naie isoidino lloga uaina cacarei. Naga Cristo dibeimo maijidino uaina cacarei. Iedo omoi jai.

¹⁷ Omoimona cue dine Estéfnas bite. Fortunato diga, Acaico diga naimie billa jira, iobidicue. Cue

dine iñedomoi; iadedi naimaci billa jira, omoi isoi cuena canodimaci.

¹⁸ Naimaci billamona cue comeci caimataide. Omoi comeciai jiai caimataide. Naie isoidinomo: “Marena maijidomoi” omoi railla.

¹⁹ Diga creyentiai Asia railla eniruemo itimaci. Imaci uaina oredimaci. Aquila, ie ai Priscila diga, ie uaina jiai orediaimaiai. Iaimaiai jofomo dajerie creyentiai rocabitimaci. Cristomo naimaci duilla jira, omoina isiruillanona, nana naie creyentiai imaci uaina jiai oredimaci.

²⁰ Nana bene ite creyentiai imaci uaina oredimaci. Nana creyentiaina eo caimare uaido.

²¹ Omoimo cue uaina jiai oredicue. Cuena canolena, naimiemo cue llua isoi, jiaimie bie carta cuega; iadedi cue mameci bene dama cueticue. Nana iena ñno. Pablodicue.

²² Omoimona Cristona bu isiruiñenia, Jusiñamui naimiena duere finollesa. Cai Nama abido dane billesa.

²³ Cai Nama Jesús omoina duenailasa.

²⁴ Jesucristomo cai duilla jira, omoina cue isiruillana omoi uiñuana jitaidicue. Mai. Macaibaite.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488